

## TETELA BOBO'ANA MAKI 'I'ETOLADINA

Buki gete solanaya Yesu 'ina guinuwa waiwaidi 'iemwasalidi, nate yaluyaluwa bi'i 'iewaiwai sinedi ga tomota 'ediyega 'iula apwesedi, wate le'oasa yaudi 'igiebobo'enedi, wate yagila be lisu 'iloinedi, ta 'itauya ola debanega. Boda sinabwadi 'ie'enidi masula gidalina 'enega, ta Anuwa Tabu 'igie'esasena, ga wate 'ana tolomugiyao 'idi onao 'iewaiwai sinedi, ta wate bubuna to'umalina ta 'ana e'isa mwawasa 'iewaiwaisinedi.

*Yoni togiebapitaiso 'ina loguguya*

*(Madiu 3:1-12; Luke 3:1-9, 15-17; Yoni 1:19-28)*

<sup>1</sup> Gete tetela bobo'ana To'etoseyana Yesu, Tauna Yaubada natuna, tetelina 'ana 'ebe e'ale.

<sup>2</sup> \*Lowaenei palopita Aisea Yesu manuna 'i'etoladina, ga Yaubada 'ina ona 'isimanena, 'igwae:

“Gete 'igu toepilialeale yaetune be 'inugana be manuyo 'eda 'ikakali,

<sup>3</sup> be sena mitawa daitaya\* 'enana sinabwana 'enega 'ida simana apwesa be 'ida gwae, 'Inapwana 'ina 'eda wada kakali ta wagiepaepalu.’ ”

---

\* **1:2:** Mal 3:1; Lu 7:27; Ais 40:3

\* **1:3:** *mitawa daita:* Me Yudia 'idi mitawa kaukau be gulegulewa daisinamo, ta pwatula gidalina, be kaiwenao wate nigeya sinabwadi.

<sup>4</sup> \*<sup>1</sup>Enega Yoni togiebapitaiso nina 'iapwesa sena mitawa daitaya ga 'iguguya tomota 'ediya, 'igwae, “<sup>1</sup>Imi bubuna to'umalidi 'ediyega wada nuwa'ebuni be 'enega yada giebapitaisoemi ta Yaubada 'imi bubuna nidi 'ida nuwataudi.”

<sup>5</sup> Ta tomota yauyaudi sena Yudia maibo'ana 'enega be 'asa Yelusalema 'enega sidelima Yoni 'ina guguya sabi nonona, ga 'idi bubuna to'umalidi sisimantedi, ga 'igiebapitaisoedi bwasi Yolidani 'enaya.

<sup>6</sup> Yoni 'ana 'oama yobai kameli unuununa tuga, ta 'ana gadiwana kameli bwalana, ta 'ana masulao bilolo be mu'awa tuga.

<sup>7</sup> Ta Yoni 'iguguya ga 'igwae, “<sup>7</sup>Tauna muliguyega 'imeemai 'isinabwa sinegu, 'enega nigeaya 'ilobwelobwenegu be 'aenaya yabwagobwago be 'ana 'aelawa yali'ami.

<sup>8</sup> \*<sup>1</sup>Abo'agu bwasiyega tuga yagiebapitaisoemi, ta tauna Yaluyaluwa Tabunega 'ida giebapitaisoemi.”

*Yesu 'ana giebapitaiso  
(Madiu 3:13-17; Luke 3:21-22)*

<sup>9</sup> Tuta gote 'enaya Yesu 'asa Nasaleta 'ipilisinena, nate sena Galili 'enega, ga 'imai bwasi Yolidani 'enaya ga Yoni Yesu 'igiebapitaisoena.

<sup>10</sup> \*<sup>1</sup>Ta Yesu ni'atu bwasiyega 'igayo'oya'ama ga 'i'itatu'e ta galewa 'i'itena 'i'egegena, ta Yaluyaluwa Tabuna 'ana 'ita 'atuwa bunebune 'imwa'uta 'enaya.

---

\* **1:4:** Gu 13:34; Lu 1:77      \* **1:8:** Gu 1:5      \* **1:10:** Yo 1:32

11 \*'Enega 'ebweu 'enana galewega 'ionama 'igwae, "Oyo natu'ai'ailigu, manuyo yagwau-sowala sinabwana."

*Seitani Yesu 'itoona  
(Madiu 4:1-11; Luke 4:1-13)*

12 Gote 'enega ga Yaubada Yaluyaluwana Yesu 'ietunena ga 'itauya mitawa daitaya,

13 \*ga 'asiyata poti gote 'ena 'imiyana ta tuta nidi 'ediya Seitani 'itoo waiwai be 'aene Yesu 'igiebe'u. Ta sena nina 'enaya yobai bosasa wate simiyami, ta aneloseyao Yesu si'ita'i'isina.

*Togomana site ata Yesu 'ibwauyedi  
(Madiu 4:12-22; Luke 4:14-15, 5:1-11)*

14 \*Ga tuta nina 'ena Kini Elodi 'iloina ga 'enega Yoni deliya sisa'u luguyena ga muliyega Yesu 'iapwesa Galili, ga Tetela bobo'ana Yaubada 'enega 'iloguguyaena,

15 'igwae, "Tuta ni'atu 'iapwesama be Yaubada 'ida etoloina 'edaya. 'Enega 'imi guinuwa to'umalidi 'ediyega wada nuwa'ebuni be Tetela bobo'ana wada emise."

16 'Enega 'ebweu tuta Yesu ola Galili le'awinaya 'iwadawada'e ga togomana siteluwa matasina 'i'itedi Galili olanaya 'idi gomana siyauyauye, 'adi esanao Saimoni be Anidulu.

17 Ga Yesu 'ibwauyedima, 'igwae, "Wamuliyegu be yada gibubumi tomota 'adi togomanao."

18 \*Gote 'ena 'idi gomana sipilisinena ga Yesu simuliyena.

---

\* **1:11:** Sam 2:7    \* **1:13:** Ib 4:15    \* **1:14:** Md 3:2    \* **1:18:** Md 19:27

19 'Enega 'iawada'e nao tupwana ga Yemesa be Yoni, taudi Sebedi natunao, 'i'itedi wagaya 'idi gomana sigibugibudi,

20 ga 'ibwauyedima, ga tamadiya ma ina topaisewao siebesinedi nada wagaya ta Yesu simuliyena.

*Yesu 'ebweu tai 'enega yaluyaluwa bi'i 'iula apwesena*

*(Luke 4:31-37)*

21 Ga muliyega simai 'asa sinabwana 'ana esana Kapaneumi 'enaya, ga Sabateya Yesu anuwa tapwalolo 'ena 'ilugu ga 'ie'ita.

22 \*Ta tomota maibo'adi nuwadi 'iowana 'ina e'ita manuna, ga sigwae, "E'ita gete palupaluna ta waiwaina, ta 'ida loina 'ana toe'itao 'idi e'ita nenetana."

23 \*Ta anuwa tapwalolo nina 'enaya 'ebweu tai 'imiyami, ta tai nina 'enaya yaluyaluwa bi'i lowa 'ilugu ga 'imiyami, 'enega tai nina Yesu 'ena 'ibwau,

24 'igwae, "Yesu, 'oyo goma Nasaleta, to'ase 'alena ga 'umai 'emaya? Nuwanuwayo be 'aene 'uda pe'uma, aga? Ta 'oyo sa'i ni'atu yamwala-tonimu, 'oyo tuga Yaubada Natuna."

25 Ta Yesu 'iloinena, 'igwae, "'Ulosa'u be tai nate 'enega 'uapwesama."

26 'Enega yaluyaluwa bi'i tai nina 'igietaina ga 'idededela ta 'imagana toila ga muliyega yaluyaluwa bi'i tai solanega 'iapwesa.

27 'Enega tomota maibo'adi silosuyaedi ga taudimo sienaidedi, sigwae, "Mwa'adega e'ita

---

\* 1:22: Md 7:28      \* 1:23: Mk 5:7; Yo 6:69

auwauna gete? Gete tai nina 'ina loinega yaluyaluwa bi'i 'iloiloinedi ta siematamatane.”

<sup>28</sup> 'Enega Yesu tetelina silelewanena Galili senanao maibo'adi 'ediya.

*Yesu tole'oasa yaudi 'igie bobo'anedi  
(Madiu 8:14-17; Luke 4:38-41)*

<sup>29</sup> Ta Yesu anuwa tapwalolo 'enega 'iapwesa ga Yemesa be Yoni ma'enaos itauya Saimoni be Anidulu 'idi anuwaya.

<sup>30</sup> Ga Saimoni lawana ooyaiyaiyega 'ile'oasa, 'enega Yesu siemataluwena tole'oasa nina manuna.

<sup>31</sup> Ga Yesu 'ilugu 'enaya ga nimanaya 'igiyaina ga 'igietoolona, ga 'ina le'oasa 'isaligogo. 'Enega waine nina 'iapwesa ga 'adi masula 'igibubuna.

<sup>32</sup> \*Ta sinala ni'atu 'isugusuguwa, ga tomota 'idi tole'oasao be taudi yaluyaluwa bi'i 'ediyege sile'oasa maibo'adi sime'edi Yesu 'enaya,

<sup>33</sup> \*be wate 'asa 'ana tomiyanao maibo'adi siegogonama ga anuwa nina matanaya sitoolo.

<sup>34</sup> 'Enega tole'oasao yaudi be taudi yaluyaluwa bi'i 'igie kabaleyedi maibo'adi Yesu 'igie bobo'anedi. Ta yaluyaluwa bi'i 'eguma 'iula apwesedi 'i'etobodedi be geya'abo sisimasimane, manuna tauna simwalatonina.

*Yesu Galili senananaya 'iloguguya  
(Luke 4:42-44)*

---

\* **1:32:** Md 4:24      \* **1:33:** Mk 3:11-12; Gu 16:17-18

35 \*Ta 'enega gonamapumapuya† Yesu 'itoolo ga anuwega 'iapwesa ga tebwuena 'itauya mwatui daitaya ga 'isidasida Yaubada 'ena.

36 Ta Saimoni magosenao wate siapwesa ga Yesu si'ebesena,

37 ga silobenaya ta sieonena, “Tomota yaudi nuwanuwadi 'oyo.”

38 Ta Yesu 'igwae, “Tatatauya 'aina wate 'asa 'ediya be yaloguguya. Gete manuna yamai.”

39 \*'Enega Galili maibo'ana 'iasakowasiyena ga 'idi anuwa tapwalolo 'ediya 'iloguguya ta wate yaluyaluwa bi'i tomota 'ediyega 'iula apwesedi.

*Yesu tolepelu 'ebweu 'igie bobo'anena*

40 Ta tolepelu 'ebweuna Yesu 'ena 'imai ga 'i'aetulasaya ta 'isidena, 'igwae, “'Eguma 'imu nuwanuwa nadigega, kapekapeyana be 'ugie bobo'anegu.”

41 'Enega Yesu 'i'atenuwa 'ole'oleyena ga nimanega tai bwalana 'igitoona ta 'igwae, “O bobo'ana! 'Uda 'esasa!”

42 Ga tai nina 'ana lepelu 'igumwala manini, ga 'i'esasena.

43 \*Ta Yesu tai nina 'i'ena pa'alena,

44 'igwae, “'Utatauya ta geya'abo 'ebweu wate yaita 'ena 'usimasimanegu, ta esi palupaluna 'utatauya totaliya 'enaya be 'i'itayo, be 'enega 'imu taliya 'u'ebwaya Yaubada 'ena, to'ase nadigega 'ada lolina Mosese 'enega, be 'enega tomota simwalatoniyo 'aene ni'atu 'u'esasemu.”

---

\* 1:35: Md 14:23; Lu 5:16 † 1:35: *gonamapumapuya*:  
Gonagona gidalina. \* 1:39: Md 4:23-25 \* 1:43: 1 Loi 14:1-4

45 \*Ta tolepelu nina nigeza Yesu 'ina lolina 'iematamatane, ta tomota yaudi 'ediya 'iesimasimana. 'Eneza Yesu nigeza sawesawenaya 'ia'ata'atamana 'asa nidi soladiya, ta 'eneza 'itauya sena mwatui daitaya ga nada 'imiyamiya, ta tomota sena yaudi 'ediyega sitauya 'enaya.

## 2

### *Yesu tokweno 'igie bobo'anena (Madiu 9:1-8; Luke 5:17-26)*

1 'Asiyata 'aina sigumwala ga Yesu 'iila Kapaneumi 'enaya, ga alena sinonona 'aene Yesu ni'atu 'iila limanama.

2 Ta 'eneza pwalu sinabwana anuwa solanaya be wate 'awa 'atamaninaya siegogona, ga Yesu 'iguguya 'ediya.

3 Ta tokweno 'ebweu sime'ena ta 'ana to'aalao site ata 'ebe 'enoega si'aalinama,

4 ga sitoona be 'aene tokweno nina siluguye Yesu 'ena, ta nigeza sawesawediya, manuna pwalu sinabwa wawasae, 'eneza si'aala tu'eyena anuwa debanaya ga 'ana 'atowa si'ewayaulena, ta 'eneza tokweno nina ma 'ebe'enona si-etabetabeyena ga Yesu matanaya sisa'una.

5 \*'Eneza Yesu ni'atu tai nidi 'idi emisa 'imwalatonina ga tokweno nina 'ieonena, "Natugu, 'imu bubuna to'umalidi 'adi nuwatau ni'atu 'ulobedi."

---

\* 1:45: Mk 7:36      \* 2:5: Lu 7:48

6 \*Ta 'aina lolina 'ana toe'itao Yesu selabenaya simiyami ga 'ina ona sinonona ga taudimo 'atediya sinuwanuwa,

7 “Yesu gete mwa'adega ga Yaubada 'ena 'ioopa'ala? Manuna nigeaya 'ebweu yaita sawesawenaya be tomota 'idi bubuna to'umalina 'ida nuwataudi, nate namo Yaubada sawesawenaya.”

8 Ta Yesu ni'atu 'atenaya 'idi nuwanuwa 'imwalatonina, 'enega 'ieonedi, “To'ase manuna nate nadigega wanuwanuwa'esa?

9 Ta to'ase wanuwena yada onae tokweno gete 'enaya be 'aene yada gwae, ‘Imu bubuna to'umalina ni'atu yanuwataudi,’ nai yada gwae, ‘Utoolo be 'imu 'ebe'eno 'u'aali be 'utatauya’?

10 Ta wada mwalatoni 'aene 'abo'agu Tomota Natuna,\* be ma igu lolina bale'uya be tomota 'idi bubuna to'umalina yanuwataudi.”

11 'Enega tokweno nina 'ieonena, 'igwae, “'Abo'agu gete yaeonayo, ‘Utoolo be 'imu 'ebe'eno 'u'aala be 'utatauya 'imu 'asaya.’ ”

12 \*Ta 'enega 'itoolo ga 'ina 'ebe'eno 'i'aalena ga boda matadiyega 'iapwesa. Gote 'ena pwalu maibo'adi nuwadi 'iowana ta Yaubada situpuna, sigwae, “Guinuwa gete 'ebe nuwaowana ga batuwa namo ta'itena.”

*Yesu Libai 'ibwauyena*  
(Madiu 9:9-13; Luke 5:27-32)

---

\* 2:6: 1 Yo 1:9; Ais 43:25      \* 2:10: **Tomota Natuna:** Yesu tauna 'ieesena The Son of Man, 'ana mwalatoi tomota tuga. Yesu taunamo 'ieesena Tomota Natuna, ta 'ina e'itao 'ediyega tomota simwalatonina 'aene tauna To'etoseyana Keliso.      \* 2:12: Md 9:33



13 'Enega Yesu 'iapwesa limana Galili le'awinaya, ta wate pwalu siegogonama, ga 'ie'ita 'ediya.

14 Ta 'ina e'ita 'ilosalonina ga 'itautauya ga 'ebweu takisi 'ana to'ewa 'i'itena 'ina anuwa 'ebe paisewa 'ena 'imiyami. Tai nina Libai, ta tamana Alipio. Ga Yesu 'ieonena, “Libai 'umuliyegu.” 'Enega Libai nina 'itoolo ga Yesu 'imuliyena.

15 Ta muliyega Yesu ma ina tononoyao simai Libai 'ina anuwaya sabi 'e'ai, ga boda Yesu simuliyena, taudi takisi 'ana to'ewao be wate 'aidi toto'umalidi, ga Yesu ma ina tononoyao ma'ediyao simiyatowa.

16 \*'Enega Palisi 'idi loina 'ana toe'itao si'itena, ga Yesu 'ina tononoyao 'ediya sienaida, sigwae, “To'ase manuna 'imi toe'ita takisi 'ana to'ewao ta wate toto'umalidi 'aina ma'ena'ao si'e'ai egogona?”

17 \*Ta Yesu ona gete 'inonona ga 'ieonedi, “Taudi bobo'adi geya nuwadi togile'oasa, ta tole'oasao esiya nuwanuwadi togile'oasa. 'Abo'agu yamaiya nigeya topalupaludi manudi, ta toto'umalidi sabi lemedi.”

*Yesu 'ina ona 'ebotana manuna  
(Madiu 9:14-17; Luke 5:33-39)*

18 Ta Yoni 'ina tononoyao be wate Palisiyao 'e'ai 'enega siedidigula 'idi tapwalolo manuna, 'enega 'aina tomota Yesu 'ena simai ga sieonena, sigwae, “Yoni 'ina tononoyao be wate Palisiyao 'idi tononoyao siedidigula, ta mwa'adega ga 'enega 'imu tononoyao nigeya siediedidigula?”

---

\* 2:16: Md 11:19; Lu 15:1-2      \* 2:17: Lu 19:10; 1 Ti 1:15

19 \*'Enega Yesu ona semalimaliyega 'ieonedi, 'igwae, “Mwa'adega, 'ilobwenena be ai 'ana toyo'oyao siedidigula 'abo toai me'olotona ma'ediya simiyami? Nigeya sa'i! Manuna tauna ma'ena maibo'adi siegwausowala.

20 Ta wanuwa'i'isi 'aene tuta 'imeemai be toai nina 'ipilisinedi, 'enega esi sinuwa mwau be siedidigula ta si'ebotana.”

21 \*Ta 'ebweu wate onasemalimali 'i'ebwa'edi, 'igwae, “Nigeya sawesawenaya be kaleko auwauna senasenaminega 'oama kadekadelina tabwabwada, 'abona nai esabu nina 'iesabu toili.

22 Ta wate nigeya 'ebweu yaita oine auwauna 'ida siwena bwala 'ebesiwa kadekadelidi 'ediya, 'abona nai si'alasabudi be oine ta 'ebesiwa 'adi mudala, ta esi tada siwai 'ebesiwa auwau daisi-namo 'ediya.”

*Yesu Sabate 'ana 'inapwana  
(Madiu 12:1-8; Luke 6:1-5)*

23 \*Sabateya Yesu ma ina tononoyao bag-ula solanega sitauya ga tonono nidi witi atuna si'egitagedi ga si'enidi.

24 Ta Palisiyao si'itediya ga Yesu sieonena, sig-wae, “'Inapwana, mwa'adega ga 'enega 'imu tononoyao Sabate 'ana laina sile'oale'oa?”

25 \*'Enega Yesu 'ieonedi, 'igwae, “Buki Tabu 'ena si'etoladina Debida manuna be 'eguma wa-sawai, wada mwalatoni 'aene tauna magosenao sibotana sinabwana,

---

\* **2:19:** Yo 3:29      \* **2:21:** 1 Ko 10:21; 2 Ko 6:16      \* **2:23:** 2 Loi  
23:25      \* **2:25:** 1 Sam 21:1-6

26 'enega Yaubada 'ina anuwaya 'ilugu ga beledi etaetabuna 'i'ewena ga si'enina. Beledi nina ma 'ana lolina 'aene totaliya dimo 'adi tagwala be sida 'ani. Ta tuwa tuga sibotana, 'enega totaliya sinabwana, 'ana esana Ebayada, 'itagwalena ga si'enina.”

27\* 'Enega Yesu 'ieonedi wate, 'igwae, “Yaubada Sabate 'i'ebwa'eda 'ida bobo'ana manuna, nigeaya 'aene 'imweluluida Sabate manuna.

28 Manuna 'abo'agu Tomota Natuna ta wate Sabate 'ana 'inapwana.”

### 3

#### *Yesu tai nimameyomeyo 'igiebobo'anena (Madiu 12:9-14; Luke 6:6-11)*

1 'Enega muliyega Yesu 'iila limana anuwa tapwalolo 'enaya ga nada 'ebweu tai nima mey-omeyona 'ilobena.

2 \*Ta Palisiyao Yesu silomata'i'isi, be 'eguma tai nina 'igiebobo'ane Sabate 'enaya ma'etamo 'enega sida e'ewa.

3 'Enega Yesu tai nina 'ieonena, “'Utoolo be 'ulagama,” ga tai nina 'itoolo ga 'ilaga.

4 Ga Yesu 'inapwanao 'ieonedi, 'igwae, “Gete 'igu enaida 'emiya: To guinuwa bobo'ana 'edayaya? Sabate 'ena talelema nai tagie'elouya? Ta'etoseyana nai taloemwawasa?” Ga 'ina ona nigeaya sie'ie'isa.

5 \*Ta Yesu 'idune masimasiyedi ma ina gamwasowala ta ma ina nuwamwau 'idi debapa'ala

---

\* 2:27: 2 Loi 5:14 \* 3:2: Lu 13:14 \* 3:5: Md 9:13

manuna, ga tai nina 'ieonena, 'igwae, “Ni-mayo 'uyasitoto,” ga tai nimana 'iyasitotona ga 'ibobo'ana.

<sup>6</sup>\*'Enega Palisiyao ma idi gamwasowala siap-wesa ga Elodi 'ina bodao ma'ediyao siloiloina be mwa'adega Yesu sida loemwawasa'ese.

### *Boda Galili le'awinaya*

<sup>7</sup>'Enega Yesu 'ipilisinedi ga ma ina tononoyao sidolo Galili le'awinaya, ta pwalu sinabwana simuliyenama.

<sup>8</sup>Boda nidi getedi Yesu alena sinononaya ta Galiliyega be Yudiaega be Yelusalemega be Idumea senanega be Yolidani mali senega ta 'aina 'asa nidi Taiya be Saidoni selabediyega siegogonama.

<sup>9-10</sup>Ta Yesu tole'oasao 'igiebobo'anedi, 'enega tole'oasao yaudi siegigigilama sabi gitoona, 'enega Yesu 'ina tononoyao 'ieonedi, “Waga manugu wame'e be 'abo tomota siegigigila wawasae yagegelu wagaya.”

<sup>11</sup>Ta tomotai nidi 'ediya yaluyaluwa bi'i siluguya, 'eguma Yesu si'itai, sibe'u sanamwa'uta matanaya ta sibwaubwau, sigwae, “'Oyo Yaubada Natuna.”

<sup>12</sup>Ta Yesu 'iloina pa'aledi, 'igwae, “Geya'abo wabwaubwau apwesa 'aene 'abo'agu Yaubada Natuna.”

### *Yesu site tuwelo 'iesinuwedi (Madiu 10:1-4; Luke 6:12-16)*

<sup>13</sup>'Enega muliyega 'oyaya 'itu'e ga 'ina tononoyao nidi 'iesinuwediya ga 'ibwauyedi ga situ'ema 'enaya,

---

\* 3:6: Md 22:15-16

14 \*ga 'ieonedi, 'igwae, “'Omi wate tuwelo yaesinuwemiya be 'omi ma'egwao tamiyami be muliyega yaetunemi 'aina sena 'ediya be wada loguguya

15 ta waiwaiyega yaluyaluwa bi'i tomota 'ediyega wada ula apwesedi.”

16 \*Ta 'adi esanao getedi: Saimoni (tauna wate 'ieesena Pita);

17 \*ta wate Yemesa matasina Yoni, taudi Sebedi natunao, ta Yesu 'ieesedi Bowanage (ta Bowanage 'ana mwalatoi 'aene taudi 'atuwa wepalala nadi-gega);

18 ta wate Anidulu be, Pilipi be, Batolomiu be, Madiu be, Tomasi be, mali Yemesa tauna Alipio natuna be, Tadiasi be, mali Saimoni, tauna togewana 'ebeloina manuna;

19 ta wate Yudasa Isikaliota, tauna ma'etamo Yesu 'ida sipupuye.

### *Yesu ta Bielisibubi*

*(Madiu 12:22-32; Luke 11:14-23, 12:10)*

20 \*'Enega muliyega Yesu 'iila 'ina 'asaya, ta boda sinabwa wawasae siegogona 'enaya ga nigeaya sawesawenaya Yesu ma ina tononoyao sieyawai'ata be si'a'a.

21 \*Ta 'ina susuyao sinonona 'aene Yesu nigeaya 'ida eyawai'ata, 'enega sitauya sabi 'au'ewenama, manuna sinuwena 'aene, “Ni'atu 'ikabaleya.”

22 \*Ta loina 'ana toe'itao 'aidi ni'atu Yelusaleme ga simwa'utama ga Yesu 'ina paisewa

---

\* 3:14: Lu 9:1    \* 3:16: Yo 1:42    \* 3:17: Lu 9:54    \* 3:20: Mk 6:31  
 \* 3:21: Yo 10:20    \* 3:22: Md 9:34

sinabwana si'itenaya ga sigwae, “Tai gete 'ietoguinuwa manuna Bielisibubi,\* yaluyaluwa bi'li 'idi 'inapwana 'ina waiwaiyega yaluyaluwa bi'li 'iula apwesedi.”

23 'Enega Yesu tomota nidi 'ibwauyedima ga onasemalimaliyega 'ie'ita 'ediya, 'igwae, “To'ase manuna Seitani 'aene tauna 'ana bodao 'ediya 'ida etalauwala?”

24 Ta wate 'igwae, “'Eguma 'ebweu 'ebeloina 'enaya tomotai siweweyala be taudimo silosalosaiya ma'etamo 'ebeloina nina 'ineneneta be 'ibebe'u.

25 Wate 'eguma susu 'ebweuna ta siweweyala be taudimo silosalosaiya ma'etamo sineneta be 'idi miya 'ito'umali.

26 Seitani wate nadigega, 'eguma ma gose-nao taudimo silosaiya 'iabe 'ina 'ebeloina nina 'ibebe'u be 'igugumwala.

27 \* “'Ebe'ita gete tai waiwaina nadigega Seitani 'ina anuwaya. Nigeya sawesawenaya 'ebweu yaita 'ilulugu be 'ina gwegwe 'ilo'ewadi, ta esi 'eguma 'ebweu tai balaeyega toewaiwai nina nimana be 'aena 'iyona nuganedi ta 'enega muliyega sawesawenaya 'ilulugu 'ina anuwaya be 'ina gwegwe nidi 'ilo'ewadi.

28 \* 'Enega gete yaeona 'ai'ailimi 'aene tomota 'idi loegesiyao be 'idi ona to'umalina maibo'ana Yaubada 'ida nuwataudi,

---

\* **3:22: *Bielisibubi:*** Yaluyaluwa bi'iyao 'idi 'inapwana, 'ebe matauta ta to'umalina, tauna Seitani 'ana tolema, nai Seitani tauna. Lowa me Ekiloni sibwagobwago 'enaya. \* **3:27:** 1 Yo 3:8 \* **3:28:** Ib 6:4-6

29 ta 'abo yaita Yaluyaluwa Tabuna 'i'awa to'umaliyei, geya'abo sa'i Yaubada 'inuwanuwatau, ta gete bubuna to'umalina nina 'enaya 'ida miyaataya.”

30 Gete nadigega Yesu 'iona'esa manuna sion-aona 'aene tauna 'ina waiwai yaluyaluwa bi'i 'enega.

*Yesu sinana be tasinao 'enaya simai  
(Madiu 12:46-50; Luke 8:19-21)*

31 \*'Enega ni'atu Yesu sinana ta tasinao simai ga 'atamanaya sitoolo, ta 'enega ona namo si-etunena be 'aene Yesu 'ida apwesama 'ediya.

32 Ga tomota nidi Yesu selabenaya simiyatowa sieonena, “'Inapwana, sinayo be tasimwao wa'ita apwesa, ta nuwanuwadi 'oyo.”

33 Ga Yesu 'ieonedi, 'igwae, “Yaita sinagu ta yaisigedi tasigwao?”

34 Ga taudi nidi selabenaya simiyami 'iduneyediya ta 'igwae, “Gete taudi sinagu be tasigwao.

35 \*'Enega 'eguma yaisigedi Yaubada 'ina nuwanuwa simulimuliye taudi tasigwao be nuugwao be wate sinagwao.”

## 4

*Onasemalimali tolelewana manuna  
(Madiu 13:1-9; Luke 8:4-8)*

1 Muliyega wate Yesu 'iila limana Galili le'awinaya sabi loguguya ta boda sinabwana siegogona 'enaya, 'enega 'ebweu waga 'idoedoe

---

\* 3:31: Mk 6:3      \* 3:35: Yo 15:14

'enaya 'igelu ga 'imiyatowa, ta pwalu le'awayaya sitootoolo.

<sup>2</sup> Ta Yesu onasemalimali yauna 'ediyega 'ie'ita tomota 'ediya, 'igwaegwae,

<sup>3</sup> “Wanono! Tobagula 'ebweu 'ina bagulaya 'itauya ga witi atuna 'ilelewanedi,

<sup>4</sup> ga 'aina atu nidi 'edaya sibe'u, 'enega manuwa si'itedi ta simwa'uta ga si'enidi.

<sup>5</sup> Ta 'aina sibe'u bwa'a logulegulewana 'enaya ga sitabwa manini, manuna bwa'a gidalina tuga,

<sup>6</sup> 'enega ala 'itudimwedi ga si'oapelu, manuna lamudi nigeya bwa'a gonituna silobaloba.

<sup>7</sup> Ta 'aina kwakwakwala 'ediya sibe'u ga sitabwa enoenowa, ta nigeya kapekapeyana be siuwa, manuna kwakwakwala 'iewaiwai ga 'ididiemwawasidi.

<sup>8</sup> Ta 'aina atu bwa'a bobo'ana 'enaya sibe'u ga sitabwa ta sisinabwa ga siuwa, ga 'aina teti, be sikisiti, be analedi.”

<sup>9</sup> Ga Yesu 'ieonedi, 'igwae, “'Eguma matenami ona gete wada nono.”

### *Onasemalimali 'ina apwesas 'alena*

<sup>10</sup> Muliyega pwalu sidelisawala ga Yesu tau-namo, ga 'aina tomota ta 'ina tononoyao site tuwelo ma'ediyao simai ga Yesu 'ena sienaida, sigwae, “'Imu onasemalimali nidi to'ase 'adi mwalatoi?”

<sup>11</sup> \*Ta Yesu 'igwae, “'Omi ni'atu Yaubada 'emiya 'ie'bwaya be 'ina lolina sola'ai'ailidi 'ana tomwalatoyao, ta esi tomota yaudi nuwa potapotadi ga onasemalimali sinono,

---

\* **4:11:** 1 Ko 2:10



12 \*ta 'ana nuwasabwalena nigeya simwalamwalatoni, ta wate 'ana mwalatoi si'ebe'ebese ta nigeya sawesawenaya siloba. 'Enega wate nigeya sawesawenaya 'idi loegesiyo 'ediyega sinuwanuwa'ebuni, be geya'abo Yaubada 'inuwanuwataudi.”

*Onasemalimali tolewana manuna 'ana li'ama (Madiu 13:18-23; Luke 8:11-15)*

13 'Enega Yesu 'ieonedi, 'igwae, “Mwa'adega 'igu onasemalimali gete nigeya wanuwanuwa sabwaleni, aga? Be mwa'adega 'aina onasemalimali gete nadigega wada nuwasabwalenidi?

14 “Tobagula nina Yaubada 'ina ona 'ilelewanena.

15 'Aidi atu sibe'u 'edaya, 'atuwa nadigega tomotai Yaubada 'ina ona sinonona, ta 'enega Seitani 'imai ga ona nina 'ediyega 'i'ewa yauledi.

16 “Wate nadigega atu nidi bwa'a logulegulewana 'enaya sibe'ube'u, 'aene 'abo tomota nidi Yaubada 'ina ona sinonoi ta ma idi gwausowala sitatagwala,

17 \*ta nigeya lamudi 'ipa'apa'ala, 'enega tuta gidalina namo 'enaya sida miyami, be 'abo to tuta 'enaya Yaubada 'ina ona 'ana emisa manuna mwau nai etalauwala silobai, sibe'u manini.

18 \*“(Ta atu nidi kwakwakwala 'ediya sibe'uya 'atuwa tomota nidi taudi Yaubada 'ina ona sinonona,

19 ta esaesa be bale'u 'ina yageyao 'adi nuwanuwa 'ediyega Yaubada 'ina ona sinuwa

\* 4:12: Ais 6:9-10; Yo 12:40

\* 4:17: Kol 2:7

\* 4:18: Mk

10:21-22; 1 Ti 6:9-10

pupulena, 'enega nige ya sawesawenaya be siu-uwa.

<sup>20</sup> “Ta atu nidi bwa'a bobo'ana 'ena sibe'uya 'atuwa tomota nidi taudi ma idi 'atetagwala Yaubada 'ina ona sinonona, 'enega uwadi bobo'ana ta yauna siuwaedi. 'Aina uwadiyao teti, ta 'aina sikisiti, ta 'aina analedi.”

*Onasemalimali mayale manuna  
(Luke 8:16-18)*

<sup>21</sup> Ta Yesu wate 'ediya 'igwae, “Geya'abo mayale loeloe'abina tasa'usa'u kwaiye 'ule nai sita 'ediyega, ta esi 'atamanaya tasa'u be 'imaedana,

<sup>22</sup> be 'enega yage nidi kwaikwaiyidi ma'etamo maedana nina 'igieapwesedi be ta'itadi.

<sup>23</sup> 'Eguma matenami ona gete wada nono.”

<sup>24</sup> \*Ta wate 'ieonedi, “Wada nuwa'l'isi be ona wada nono 'ai'ailidi, manuna 'eguma 'omi to'ase wa'ebwaya, wate nadigega 'ana e'isa wa'ewa, ta esi ma 'ana loeposeyana.

<sup>25</sup> Manuna 'eguma yaita 'enaya Yaubada 'ina gwegwe 'imiyami, gwegwe nina 'iloeposeyane. Ta yaita 'enaya nige ya Yaubada 'ina gwegwe 'imiyami, to'ase 'ena 'imiyami Yaubada 'enega 'i'ewa yauledi.”

*Onasemalimali suwana manuna*

<sup>26</sup> Ga Yesu 'igwae, “Yaubada 'ina loina tomota 'ediya 'atuwa nadigega suwana tai 'ina tanowaya 'iasodi,

<sup>27</sup> ta tai nina 'i'eno be 'itoolo 'asiyata be boiboiya, ta suwana nidi sitabwatabwa,

---

\* 4:24: Lu 6:38

ta nigeaya 'imwalamwalatoni mwa'adega sitabwatabwa'esa.

<sup>28</sup> Manuna bwa'a 'iloina 'idi tabwa be 'idi sinabwa be 'idi uwa manuna,

<sup>29</sup> \*be muliyega 'abo uwana 'imatuwa 'enega toni bagula nina 'ie'ale be 'isesoni.”

*Onasemalimali beno atuna manuna*

<sup>30</sup> Yesu wate 'ieoned, 'igwae, “Mwa'adega Yaubada 'ina loina onasemalimaliyega yada giemaedana'ese 'emiya?

<sup>31</sup> Nai gete nadigega 'ebweu kaiwe atuna 'enaya yada loesawa'i'i, nate beno, manuna beno atuna gidalina,

<sup>32</sup> ta 'abo taasoi be 'itatabwa pwatula 'isinabwa sinedi, ta nalinao sinabwadi 'isa'udi, be nalinao yauyaukwidi 'ediya manuwa 'idi newa si'abidi.”

*Yesu 'ina onasemalimali yauna  
(Madiu 13:34-35)*

<sup>33</sup> Yesu 'ina loguguyao 'ediya tuta yauna onasemalimali yauna 'ediyega 'ie'ie'ita, be 'enega 'abo tomota 'ediya kapekapeyana sida mwalatoni.

<sup>34</sup> \*Tauna tuta yauna onasemalimaliyega 'iloguloguguya pwalu 'ediya, ta 'ina tononoyao dimo 'ediya onasemalimali nidi 'ili'ali'amidi.

*Yesu yagila be lisu 'iloinedi  
(Madiu 8:23-27; Luke 8:22-25)*

<sup>35</sup> 'Asuinuwanuwaya Yesu 'ina loguguya wagega 'ilosalonina ga 'ina tononoyao 'ieoned, 'igwae, “Wageluma be taabala mali esenaya.”

---

\* 4:29: Et 14:15      \* 4:34: Yo 16:25

<sup>36</sup> 'Enega sigelu ga sigiseyana ga pwalu le'awaya sipilisinedi, ta 'aidi waga wate ma'ena,

<sup>37</sup> ga wediliya sinabwana 'itowama, ta lisu wagaya 'isiwasiwa'oya'a ga 'iabe sidadamana.

<sup>38</sup> Ta Yesu waga kuliginaya 'ana gedu 'isa'una ga 'i'eno mwataya, ta 'ina tononoyao silowanowanona ga sigwae, "Inapwana 'utoolo be 'ulemeda. 'Iabe tamwamwawasa!"

<sup>39</sup> 'Enega Yesu 'itoolo ga yagila be lisu 'iba'edi, 'igwae, "Tuwa! 'U'emutuyo be 'usiwalowa!" 'Enega yagila 'ipela ga bwagabwaga maibo'ana 'isiwalowa.

<sup>40</sup> \*Ta 'ina tononoyao 'ediya 'igwae, "To'ase manuna wamatauta? Mwa'adega nigeya waemiemisegu?"

<sup>41</sup> \*Ta nuwadi 'iowana ga simatauta, ta taudimo 'ediya sigwae, "To tai sana gete ga yagila be lisu 'enana siematamatanena?"

## 5

### *Yesu yaluyaluwa bi'i 'iula apwesedi (Madiu 8:28-34; Luke 8:26-39)*

<sup>1</sup> 'Enega siabala ga silugu me Gelasine 'idi le'awaya,

<sup>2</sup> \*ga wagega Yesu 'isuya dabalaya, ta tai 'ebweu 'ilobena mayaluyaluwa bi'ina 'ina 'ebemiya duluwa, 'enega 'iapwesama, ta duluwa nina tomota 'adi 'ali'ali.

<sup>3</sup> Ta tai gete lowa tomota sitoo be 'aene sida yoni malakwa kainumu 'enega, ta nigeya sawe-sawediya,

---

\* **4:40:** Md 14:31    \* **4:41:** Sam 89:9    \* **5:2:** Mk 1:23

4 manuna malakwa nidi nimanaya be 'aenaya tuta yauna 'ilasalasadi ta nigeya 'ebweu sawe-sawenaya be 'igiyai,

5 ta 'idena sinedi ga 'itauya mitawaya ta boiboia be 'asiyataya 'ali'aliya be 'oyaya 'iemagamagana, ta tauna gulewega 'iunuunu.

6 \*Ta tai nina ni'atu 'edasolega Yesu 'i'itenama, 'enega 'ipili ga Yesu matanaya 'ilobwagoena,

7 ta 'imagana toila, 'igwae, “Yesu ye, 'oyo Yaubada Toewaiwai sana Natuna, to'ase 'utootoo be 'uguinuwe 'eguya? Tuwa! Yaubada 'ana esanega yasida 'emuya be geya'abo 'uda giegie'elouyagu.”

8 Ona gete 'i'inanena manuna Yesu ni'atu 'ieonena, “Yaluyaluwa bi'i niyo tai gete 'enega 'uapwesama.”

9 Ta Yesu wate 'ienaida yaluyaluwa nina 'ena, 'igwae, “Mwa'adega 'amu esana?” Ga tauna 'igwae, “'Agu esana Tomoyauyau, manuna mabodama tai gete solanaya 'amiyami.”

10 Ga 'isidasida gewagewana Yesu 'ena 'aene geya'abo 'asa gote 'enega 'ietuetune apwesedi.

11 Ta sena gote 'enaya bawe yauna siduwaduwala 'oyaya.

12 Ta yaluyaluwa bi'i nidi sisida Yesu 'enaya ga sigwae, “Uetunema be 'alulugu bawe gotedi 'ediya.”

13 'Enega Yesu 'itagwaledi ga yaluyaluwa bi'i tai nina 'enega siapwesa ga bawe 'ediya silugu, 'enega bawe nidi siekabaleya ga maibo'adi sipili bulibuliyasu ga babagega sisobu olaya ga

---

\* 5:6: Mk 1:24

sidamana. Ta bawe nidi 'adi yau nadigega tu tausani.

14 'Enega bawe 'adi to'ita'i'itao 'idi matautega siden ga sitauya 'asaya, ga yage nidi si'itedi maibo'ana sisimani 'asa sinabwana be 'asa gidalidi tomotenidi 'ediya. 'Enega toni'asa nidi simai be 'aene taudi matadiyega sida 'ita to'ase 'iapwesa.

15 Ta Yesu 'ena simai ga tai nina bada si'itena, lowa yaluyaluwa bi'i solanaya simiyami ni'atu debana 'ipalupalu ga 'oama 'i'otena ta 'imiyami. Gote 'ena maibo'adi simatauta.

16 'Enega toepilialeale nidi tomotai 'ediya siemwasala mwa'adega tai nina 'ibobo'ana'esa, ta mwa'adega bawe siesilae'esa.

17 Ta toni'asa nidi silolagata ga Yesu sie'idi'idiyena 'aene 'idi sena 'ida pilisine.

18 'Enega Yesu wagaya 'idolodolo sabi gelu, ta tai nina ni'a 'igiebobo'anena Yesu 'ena 'isida, 'igwae, "Inapwana, sawesawenaya yamuliyeyo?"

19 Ta Yesu 'igwae, "Nigeya sawesawenaya, ta esi 'uila be 'utatauya 'imu susuyao 'ediya be Yaubada 'ina 'atenuwa'ole'oleyega 'igiebobo'anemuya 'uemwasali be sida nono."

20 'Enega tai nina 'itauya 'ebeloina Dekapoli 'ana 'asa sanau 'ediya ga Yesu 'ina guinuwa waiwaina manuna 'ietetela ga tomota maibo'adi sinonona ga nuwadi 'iowana.

*Yesu iine 'eluwa 'igiebobo'anedi  
(Madiu 9:18-26; Luke 8:40-56)*

21 Ga Yesu ma 'ana tomuliyao siabala limana, ga boda sinabwana siegogonama le'awa nina 'enaya.

22 \*'Enega 'ebweu tai, 'ana esana Yailo, tauna anuwa tapwalolo 'ana to'ita'i'ita, 'imai ga Yesu 'ilobena ga matanaya 'ibwagobwago,

23 ga 'isida waiwai, 'igwae, “'Inapwana, natugu mewainena 'ana le'oasa 'imwau 'ai'aila, ta tauna gwama tuga, ta nuwanuwagu 'umama be 'uda gitoo be 'ida bobo'ana, ta geya'abo 'imwawamwawasa.”

24 'Enega Yesu ma'iyana sitautauya, ga boda sinabwana simulimuliye ta siegigigila 'edaya.

25 Ta boda nidi soladiya 'ebweu waine ma'edi ma ina le'oasa. Le'oasa nina nate lalana 'idaudau yakwala tuwelo 'ediya, ta tuga 'etamo 'idaudau.

26 Lowa togile'oasa yaudi 'ediya 'ina mani maibo'ana 'iloegumwalina, ta sa'i 'idi guinuwa 'enega nigeya 'ida bobo'ana, ta esi 'ana le'oasa 'isininabwa.

27-28 \*Waine nina Yesu 'imuliyena manuna lowa tetelina 'inonona, ga 'atenaya 'inuwanuwa 'aene, “'Eguma tuga Yesu 'ana 'oama namo yagitoo yada bobo'ana.” 'Enega 'iloselabena ga 'ana 'oama 'igitoona

29 ga lalana 'ina dau 'iyapasa manini, ta taunamo oona solanaya 'ilotoona 'aene ni'atu 'ibobo'ana.

30 \*Ta Yesu ni'atu 'ilotoona 'aene waiwai 'enega 'iapwesa ga 'iasakowasi ga boda 'ienaidedi, 'igwae, “Yaita 'agu 'oama 'igitoona?”

---

\* 5:22: Mk 7:32; Lu 13:13      \* 5:27-28: Mk 6:56      \* 5:30: Lu 6:19

31 Ta 'enega 'ina tononoyao sieo-nena, “Inapwana, ni'atu 'u'itena boda sia'oabu'oabayemu ta siegigigila, ga 'oyo 'uenaida, ‘Yaita 'igitoogu?’ ”

32 Ta Yesu 'ilo'ita dadana tomota gamwagamwanidiya be 'ida 'ita yaita 'ina waiwai 'ena 'iabala.

33 Ta waine nina taunamo 'ana bobo'ana ni'a 'ilobena 'imwalatonina, 'enega 'imai ga ma ina dedela 'ina matauta manuna 'ibe'u sanamwa'uta matanaya ga 'isimana 'ai'aila 'aene tauna 'iguinuwena.

34 \*Ta Yesu 'igwae, “Natugu, 'imu emisa 'enega 'ubobo'ana. 'Utoolo be ma imu gwau-sowala 'utatauya. 'Imu le'oasa maibo'ana ni'atu 'igumwala.”

35 Tuta nina Yesu 'ionaona waine 'enaya 'aina tomota Yailo 'ina anuwega ale sime'ena, ga sigwae, “Natuyo ni'atu yawasina 'igumwala, ta geya'abo wate toe'ita nina 'ina tuta 'umudamudali.”

36 Ta Yesu wate ale nina 'inonona ga Yailo 'ieonena, 'igwae, “Geya'abo 'u'ate'ate sa'ala, ta esi 'uemisegu tuga.”

37 'Enega Yesu boda yauna 'i'etobodedi be geya'abo simulimuliye, ta nate namo 'ina tononoyao sitetoi ma'ena, nate Pita be Yemesa matasina tauna Yoni

38 sitautauya ga Yailo 'ina anuwaya siapwesa ga 'ewabamu be dedoi sinabwana sinonona.

---

\* 5:34: Mk 10:52; Lu 7:50, 17:19



39 \*Ta Yesu 'ilugu ga 'ieonedi, “To'ase manuna wadedoi ta waegalagalala? Gwama nigeya 'imwawamwawasa ta 'i'eno mwataya tuga.”

40 Ta siedagiyena. Ta esi Yesu 'ipa'idi ga siapwesa, ta gwama tamana be sinana be 'ina tononoyao sitetoi Yesu ma'edi silugu gwama 'ina 'ebe'eno 'enaya.

41 \*Ta Yesu gwama nimanaya 'igiyaina ga 'igwae, “Talita kumi.” Ta 'ana gibui, “Negeyo 'utoolo.”

42 'Enega 'itoolo manini ga 'iadamana, manuna 'ana yakwala ni'atu tuwelo 'ilobena. Ta tamana be sinana nuwadi 'iowana 'ai'aila.

43 Ga Yesu 'i'etobodedi 'igwae, “Geya'abo 'ebweu yaita 'ena wasimasimana 'igu guinuwa gete manuna, ta esi gwama 'ana masula wag-ibubu be 'i'a'a.”

## 6

### *Me Nasaleta Yesu siguitoyasena (Madiu 13:53-58; Luke 4:16-30)*

1 Ta Yesu 'iila tauna 'ina 'asaya, ga 'ina tononoyao simuliyena.

2 \*Ga Sabateya 'idi anuwa tapwalolo 'ena 'ilugu ga 'itoolo ta 'ie'ie'ita ga tomota sinonona, ta yauyaudi nuwadi 'iowana 'ina mwalatoi be 'ina guinuwa manudi, ga sigwae, “Tai gete mane 'enega 'ina sinasinapu 'ilobena? Ta wate guinuwa nidi waiwaidi nimanega 'iguinuwedi, mane 'enega 'ina waiwai 'ilobena?”

---

\* 5:39: Yo 11:11    \* 5:41: Lu 7:14    \* 6:2: Yo 7:15

<sup>3</sup> \*Ta wate sigwae, “Tai gete to'abi'abi tuga aga? Ta sinana Meli, be tasinao Yemesa be Yosese be Yudasa be Saimoni be wate nuunao ma'edao tamiyami, aga?” 'Enega tomota Yesu siguitoyasena.

<sup>4</sup> Ta Yesu 'ieonedi, 'igwae, “Palopitao 'adi 'amayaba silobaloba mali 'asa 'ediya. Ta taudi 'idi 'asaya esiya nigeya 'adi 'amayabamo, manuna taudi 'idi bu'unao be 'idi susuyao siguitoy-asedi.”

<sup>5</sup> Ta Yesu nuwana 'iowana manuna tomota nigeya siemiemise, 'enega nigeya kapekapeyana be guinuwa waiwaina bada 'ida guinuwedi. Nate namo tole'oasao pu'epu'edimo 'igitoodi ga si-bobo'ana.

*Yesu 'ina tononoyao 'ietunedi sabi paisewa  
(Madiu 10:1, 5-15; Luke 9:1-6)*

<sup>6</sup> 'Enega Yesu 'isakowasi 'asa 'ediya ta 'ie'ie'ita.

<sup>7</sup> \*Ga 'ina tononoyao site tuwelo 'ibwauyedi ga 'iloinedi be 'aene 'eluwa 'eluwa sida sakowasi 'asa 'ediya, ta wate lolina be waiwai 'i'ebwa'edi be 'enega sawesawediya yaluyaluwa bi'i tomota 'ediyega sida ula apwesedi,

<sup>8</sup> ga 'ina guguya 'enaya 'iloinedi, 'igwae, “Geya'abo 'ebweu to'ase wa'ewa'ewa. Geya'abo masula nai tana nai mani 'abwaga manuna. Nate namo 'imi 'etoguna nimamiya,

<sup>9</sup> be 'ami 'aelawa wa'otedi, ta esi geya'abo 'ami 'oama 'eluwena wa'ote'otedi.”

<sup>10</sup> Ta wate 'ieonedi, “'Eguma to anuwa 'ena sibwauyemi be 'ena walulugu, anuwa nina 'ena wae'owaga be 'ana laba sena nina wapilisine.

---

\* 6:3: Yo 6:42      \* 6:7: Lu 10:1

11 \*Ta sa'i 'leguma 'asa 'aina 'ediya waapwesa be tomota nidi nigeaya si'au'au'ewami 'idi anuwa 'ediya be wate nigeaya 'imi guguya sinoonodi, 'asa nidi nedilina 'aemiyega waloutuutu yauledi ta wapilisinedi, be 'enega wae'itadi 'aene 'iabe mwau 'ediya 'iapwesa.”

12 'Enega 'ina tononoyao nidi sisakowasi 'asa yaudi 'ediya, ga siguguya be 'aene tomota 'idi bubuna to'umalidi sida guitoyasedi be sida nuwa'ebuni,

13 \*ga yaluyaluwa bi'i tomota 'ediyega siula apwesedi, ga tole'oasao yaudi wate bunamega sie'abidi ga sibobo'ana.

*Yoni togiebapitaiso 'ina mwawasa  
(Madiu 14:1-12; Luke 9:7-9)*

14 \*'Enega Yesu tetelina tomota silelewanena sena yauyauna 'ediya ga Kini Elodi 'inonona. Manuna 'aina tomota sionaona 'aene “Yoni togiebapitaiso mwawasega ni'atu 'itoolo limana 'enega ma ina waiwai 'iguiguinuwa.”

15 Ta 'aidi siona 'aene, “Tauna Ilaitiya.” Ta 'aidi wate sigwae, “Tauna palopita 'ebweu 'atuwa gimi palopitao.”

16 Elodi wate ni'atu tetela 'inonona ga 'igwae, “Nai tauna Yoni togiebapitaiso. Lowa yaloemwawasina ta sa'i 'itoolo limanaya.”

17 Manuna lowa Elodi Yoni 'igiyaina ga deliya 'iyonina, ta Yoni 'ana giyai 'alena nate 'ebweu waine 'ana esana Elodiyasa, nate Elodi tasina Pilipi mwanena ta Elodi 'i'oayena,

---

\* 6:11: Gu 13:51, 18:6    \* 6:13: Ye 5:14    \* 6:14: Md 16:14

18 ta Yoni Elodi 'ieonena 'aene, “Gote nigeya bubuna bobo'ana, manuna tasiyo mwanena 'u'oayena.”

19 Ta Yoni 'ina guguya gete manuna waine nina 'inuwa mwau 'ai'aila ga nuwanuwana be Yoni 'ida loemwawasi, ta nigeya sawesawenaya

20 manuna Elodi 'iegagalena 'aene Yoni nina tai palupaluna ta Yaubada 'ina toguinuwa 'ebweu, 'enega Elodi Yoni 'i'amayabena ga tuta yauna Elodi nuwanuwana ga Yoni 'ina ona 'inonona ta manuna 'i'atesa'ala.

21 'Enega Elodi nina 'ina 'asiyata tubuwa 'iapwesa ga Elodiyasa ni'atu 'eda 'inuwa lobena Yoni 'ana loemwawasa manuna. 'Asiyata tubuwa nina 'ana we'iwe'iyaya masulina siguinuwena ga 'aina 'owaga sibwauyedima sabi 'emasula. 'Owagao nidi gabemani 'adi toloinao be tolo-saiya 'adi toanuganao ta 'aidi Galili 'asanao 'idi 'inapwanao.

22 Tuta nina Elodi ma 'ana 'owagao si'e'ai, Elodiyasa natuna mewainena 'iluguma matadiya ga lausega 'igie gwausowalidi. 'Enega Elodi gomagweine nina 'ena 'iona oboboma 'aene “'Eguma to yage 'uesinuwa be 'usidegu yada tagwala 'emuya.”

23 Ga wate 'iona upaupa sawatamatamana 'enega 'igwae, “Ona'ai'aila yaona upaupa to'ase nai yada 'ebwa'eyo, 'eguma nai 'uda sida be 'aene 'igu 'ebeloina yada weyali manuyo.”

24 'Enega gomagweine nina 'iapwesa ga 'itauya sinana 'ena 'ienaida, 'igwae, “Sinagu, to'ase 'imu nuwanuwa be kini 'enaya yada side?”

Ta sinana 'igwae, “Kini 'ueona 'ugwae, 'Nuwanuwagu Yoni togiebapitaiso bulubuluna.’”

<sup>25</sup> 'Enega gomagweine 'ilomanini ga 'iila kini 'ena ga 'igwae, “Nuwanuwagu gete tuga Yoni togiebapitaiso bulubuluna gaeba 'ena 'usa'u be 'u'ebwa'legu.”

<sup>26</sup> Ta Elodi 'inuamwau 'ai'aila, ta nige ya kapekapeyana be 'iguitoyase, manuna ni'atu 'isawa tamatamana 'owagao matadiya.

<sup>27</sup> 'Enega deli 'ana to'ita'i'ita 'ebweu 'iloinena be 'aene 'ida tauya be Yoni bulubuluna 'ida me'e. Ga 'enega to'ita'i'ita nina deliya 'itauya ga Yoni 'otona 'i'upwena,

<sup>28</sup> ga bulubuluna gaebaya 'iusena ga 'ime'ena, ga gomagweine nina 'i'ebwa'ena, ta tauna 'i'ewena ga 'itauyena sinana 'enaya.

<sup>29</sup> Ta Yoni 'ana tomuliyao 'ina esilae tetelina sinononaya ga simai ga Yoni kokowana si'ewena, ga sisa'u 'ali'aliyena.

*Yesu pwalu 'ie'enidi*

*(Madiu 14:13-21; Luke 9:10-17; Yoni 6:1-14)*

<sup>30</sup> \*Ta ni'atu Yesu 'ina topaisewao site tuwelo siilama ga Yesu 'ena 'idi paisewa be 'idi e'ita maibo'ana sisimantedi.

<sup>31</sup> Ta tomota yau wawasae simeemai ta si-ilaila ga 'enega nige ya kapekapeyana be Yesu ma ina tononoyao sieyawai'ata be si'a'a, 'enega 'ieonedu 'igwae, “Sena getei tada pilisine be tada tauya sena mwatui daitaya be gote 'ena tupwana waeyawai'ata.”

---

\* 6:30: Lu 10:17

32 'Enega taudimo waga sigeluna ga sitauya 'ebweu sena mwatui daitaya.

33 Ta pwalu nidi Yesu ma ina tononoyao 'idi gelu si'itena ga si'inanedi, 'enega taudi be 'asa yaudi 'adi tomiyanao wate ma'ediyao 'edega sipili ga sigimiapwesa sena gote 'enaya.

34 \*Ta muliyega waga 'ilugu ga Yesu 'isuya dabalaya ga boda sinabwana kaukauya 'i'itedi, ta 'i'atenuwa 'ole'oleyledi manuna taudi 'atuwa nadigega sipiyao nigeaya 'adi to'ita'i'itamo, 'enega 'ilolagata ga sinasinapu yauna 'ie'ie'ita 'ediya.

35 \*Ga 'asuinuwanuwaya 'ina tononoyao simai ga Yesu sieonena, sigwae, "Inapwana, sena gete mwatui daita ta ni'atu sinala 'isugusuguwa,

36 'enega pwalu getedi 'uda etunedi be sida ila be 'adi masula sida gimwane 'asao be anuwao selabediya 'ediya."

37 Ta Yesu 'ieonedi, 'igwae, "Ta mwa'adega? 'Omi geya'abo wae'enidi, aga?"

Ta 'ina tononoyao sigwae, "Inapwana, nigeaya sawesawemaya, manuna maibo'adi 'adi masula 'ana maisa nai tu analedi kina nadigega."

38 'Enega Yesu 'ieonedi, 'igwae, "Eisa beledi 'emiya? Watauya be wa'ebesa." 'Enega ni'atu silobena ga Yesu sieonena, sigwae, "Beledi nima ta iyana 'eluwa 'alobedi."

39 'Enega pwalu 'iloinedi be maibo'adi simiyatowa boda be boda pwatulaya.

40 'Enega siweyalidi ga simiyatowa, 'aina boda tomota 'adi yau analedi, be 'aina boda tomota 'adi yau pipiti nadigega.

\* 6:34: Md 9:36 \* 6:35: Mk 8:1-9

41 Ta beledi nima be iyana 'eluwa 'i'ewedi ga galewaya 'i'itatu'e ta 'iona oboboma masula nidi manudi, ga muliyega beledi 'igitomwedi ga 'ina tononoyao 'i'ebwa'edi be sida eguyaiye tomota 'ediya. Wate iyana nadigega 'igitomwedi ga 'ina tononoyao 'i'ebwa'edi ta 'enega sieguyaiyedi.

42 'Enega maibo'adi si'ai ga gamwadi 'ipawa.

43 Ta beledi be iyana tupwatupwadi siegogonedi ga kodo tuwelo siloemaedi.

44 To'e'ai nidi taidimo 'adi yau paibi tausani nadigega.

*Yesu ola debanega 'itautauya*

*(Madiu 14:22-23; Yoni 6:15-21)*

45 Ta muliyega 'ina tononoyao 'iloinedi be wagaya sigegelu, 'igwae, "Wagegelu be wanugana Betesaida mali esenaya, ta 'abo'agu bada 'etamo boda yaemataluwedi be siila 'idi 'asaya."

46 \*'Enega sigelu ta Yesu pwalu 'ietunediya, ta muliyega 'itu'e 'oyaya sabi sidasida Yaubada 'ena.

47 Ga ni'atu 'iboi, ta 'ina tononoyao bwagabwagaya sil'ada'adau, ta tauna sa'i tebweuna dabalaya

48 'i'litedi 'idi neya 'enega silo'ame'ame manuna yagila matadiyega 'imeema.

Ta tomwa uliulitaya Yesu ola debanega 'itauyama be 'aene selabediyega 'ialogedo be 'ida pilisinedi.

49 \*Gote 'ena 'ina tononoyao maibo'adi Yesu si'itena ola debanega 'imeemai ga sinuwena 'aene welabana,

---

\* 6:46: Mk 1:35; Lu 5:16, 6:12      \* 6:49: Lu 24:36-37

50 'enega simatauta ga sinanala.

Ta Yesu 'ieonedi, 'igwae, “Geya'abo wamata-matauta. 'Abo'agu tuga, 'imi 'inapwana.”

51 \*Ga wagaya 'igelu ma'enaog ga yagila 'ipela.

52 Ta nuwadi 'iowana sinabwana, manuna Yesu 'ina waiwai manuna nigeaya sinuwana sab-waleni. 'Eguma tuta nina tomota yaudi 'adi beledi Yesu 'ieguyai be 'alena sida mwalatoni be 'enega sida nuwasabwaleni, ta tuga nigeaya simwalamwalatoni, manuna debapa'alidi.

*Tole'oasao 'igie bobo'enedi sena Genesaleta  
'ena  
(Madiu 14:34-36)*

53 'Enega siabala sena Genesaleta 'enaya ga le'awinaya silugu ga 'idi waga gote 'ena siloomuna.

54 Ga tuta nina sisuya toni'asa Yesu si'inanena,

55 ta 'enega tomota nidi sipili ga sitauya 'asa maibo'ana 'ediya ga tole'oasao sime'edi 'ebe'eno 'ediyega be Yesu 'ena sitauyedi to sena 'ena sinonona 'imiyami.

56 \*Ga Yesu 'isakowasi sena yauyauna 'ediya, 'aina 'asa sinabwadi be 'asa gidalidi be 'ebe bagula 'ediya. Ta tomota yaudi 'idi tole'oasao sime'edi ga 'ebe gimwane 'ediya siyamwayamwa ta sisidena sigwae, “'Inapwana, kapekapeyana be tole'oasao getedi 'amu 'oama tupitupinamo sida gitoo?” Ga Yesu 'ediya 'itagwala. 'Enega taudi 'ana 'oama sigitoona sibobo'ana.

---

\* 6:51: Mk 8:17      \* 6:56: Mk 5:27-28



## 7

*Me Yudia tubudiyao 'idi bubuna  
(Madiu 15:1-9)*

<sup>1</sup> Ta Palisiyao be lolina 'ana toe'itao 'aidi wate ma'ediyao Yelusalemega simai ga Yesu 'ena siegogonama,

<sup>2</sup> ga 'aina 'ina tononoyao si'ita lobedi si'e'ai, ta nigeya nimadi si'utu'utudi.

<sup>3</sup> Manuna Palisiyao be wate me Yudia maibo'adi 'idi bubuna tubudiyao 'ediyega nate nadigega: Nugana nimadi si'utu 'ai'ailidi be muliyega si'a'a.

<sup>4</sup> Ta 'eguma 'ebe gimwane 'enega simamai wate si'esiwe be 'enega si'a'a. Ta wate lolina yauna tubudiyao 'ediyega gaeba be keiga be 'ulena 'adi 'utu manudi simuliyedi.

<sup>5</sup> 'Enega gete Palisiyao be lolina 'ana toe'itao nidi Yesu 'ena sienaida, sigwae, “To'ase manuna 'imu tononoyao tubudao 'idi lolina nigeya si'ama'amayabedi, ta manima baibailidi si'e'ai?”

<sup>6</sup> \*Ta Yesu 'ieonedi, 'igwae, “'Omi tokabokabo. Lowaenei Aisea palopita manumi 'iona upaupa 'ai'aila, tuta nina Yaubada 'ina ona 'i'etoladina gete nadigega:

‘Tomota getedi 'awadiyega si'ama'amayabegu, ta 'atediyega nigeya.

<sup>7</sup> Ta wate 'eguya sitapwalolo besobeso, manuna 'idi e'itao 'abo'agu nigeya 'eguyega, ta esi tomota tuga 'idi nuwenuwega.’”

<sup>8</sup> Ta Yesu 'ieonedi wate, 'igwae, “Ona'ai'aila 'imi bubuna to'umalina, 'enega Yaubada 'ina

---

\* 7:6: Ais 29:13

loina wasa'u kwaiyena ta tubumiyao sa'i 'idi bubuna wamulimuliyedi.”

9 Ta wate 'igwae, “'Aene 'omi tomwalatoi 'ai'aila, ta nigeaya! Manuna Yaubada 'ina loinao waguiguitoyasedi ta esi tubumiyao 'idi bubuna wagiyai'i'isidi.

10 \*Lowa Mosese Yaubada 'ina loina 'isimanena, 'igwae, “Tamayo be sinayo 'uda 'amayabedi.’ Ta wate 'igwae, “'Eguma yaita tamana nai sinana 'i'awa to'umaliyedi, 'ilobwenena be waloemwawasi.’

11 Ta 'omi 'imi e'ita kabokabo gete nadigega, 'Abo 'ebweu yaita tamana be sinana 'ieonadi 'igwae, “'Igu gwegweyao ni'atu yatagwaledi Yaubada 'enaya ga etaetabuna, 'enega nigeaya sawesawenaya be yalememi.” ’

12 Gete 'imi loina 'enega tomota 'idi lema tamadiyao be sinadiyao 'ediya wa'eto'etobodedi.

13 Tubumiyao 'idi loina gete 'enega, be 'imi e'ita wate yauna 'ediyega, Yaubada 'ina loina waeyage besobesoena.”

*Tomota 'adi gieto'umali  
(Madiu 15:10-20)*

14 'Enega pwalu 'ibwau limedima ga 'ieonedi, “'Igu ona gete maibo'ami wanonodi be nuwami 'ida sabwalena:

15 \*Nigeaya 'ebweu to'ase tomota ta'e'ani be sigiegie bailida, ta esi yage nidi 'atedega siapweapwesa sawesawediya be sigiebailida.”

16 (-)

---

\* 7:10: Sia 20:12    \* 7:15: Md 12:34

17 'Enega Yesu ma ina tononoyao pwalu siebesinedi ga anuwaya silugu, ta 'enega 'ina tononoyao sienaidena, sigwae, “Kapekapeyana 'imu onasemalimali nina tomota 'ediya 'uda li'ami 'emaya?”

18 Ga Yesu 'ieonedo, 'igwae, “Nai 'omi wate nuwami nigeza 'isabwasabwalena, aga? 'Enega nigeza wamwalamwalatoni 'aene to'ase ta'a'ani be 'ilulugu soladaya nigeza sa'i 'ida giebailida,

19 manuna nigeza 'atedaya 'itauya ta esiya gamwada namo 'ena 'ilugu be muliyega 'itatauya sumwana 'enaya.” (Yesu 'ina e'ita gete 'ana mwalatoni 'aene nigeza 'ebweu wate masula etaetabuna, ta esi maibo'ana tada 'ani.)

20 Ta Yesu wate 'igwae, “To'ase tomota 'atediyega siapweapwesa sawesawediya be sigiebailidi,

21 \*nadigega nuwanuwa to'umalidi be loyawe, 'ipwala, loemwawasa,

22 loelata, yalakwaiya, gamwasowala, kabo, so-gala, e'ipi'ipi, sinala, gagasa be bubuna besobeso.

23 Gete yage nidi to'umalidi tomota soladiyega siapweapwesa ga sigiegie bailidi.”

*'Ebweu waine 'ina emisa Yesu 'ena  
(Madiu 15:21-28)*

24 Ga gote 'enega Yesu 'itoolo ga 'itauya Taiya be Saidoni senadiyao 'ediya ga 'ebweu anuwa 'ena 'ilugu, manuna geya nuwana be tomota sida mwalatoni 'ina mai manuna, ta sa'i nigeza kapekapeyana be 'imiya kwaiya

---

\* 7:21: Ga 5:19-21

25-26 \*manuna 'ebweu waine Yesu 'ina mai tetelina 'inonona. Ta waine nina nigeaya waine Yudia ta esi tauna goma Pinisia sena Silia solanega, ga natuna mewainena ni'atu yaluyaluwa bi'i 'igie to'umaliyena, 'enega sinanana 'imai ga Yesu 'aenaya 'ibwago sanamwa'uta, ga 'isidena be 'aene yaluyaluwa bi'i nina natuna 'enega 'ida ula apwese.

27 Ga Yesu 'igwae, "Ilobwenena be gogama 'adi masula yada 'ebwa'edi bemi, ta nigeaya sawe-sawenaya be gogama 'adi masula ya'ebwaya kedewa 'ediya."

28 Ta waine 'igwae, "Ona'ai'aila 'Inapwana, ta sa'i kedewa tuta yauna 'ebe 'e'ai 'agalaunega gogama 'adi masula mugumuguna 'enega si'e'a."

29 \*Ga Yesu 'igwae, "Kagutoki! Nate ona 'ai'aila. 'Enega 'utoolo be 'uila 'imu anuwaya. Yaluyaluwa bi'i natuyo 'enega ni'atu 'iapwesa, ga 'ibobo'ana."

30 'Enega 'itoolo ga 'itauya 'ina anuwaya ga natunana 'ilobena 'ina 'ebe'eno 'ena, ni'atu 'ibobo'ana.

*Yesu totenatui 'igie bobo'anena*

31 'Enega Yesu Taiya 'ipilisinena ga 'itauya Saidoni, ta wate 'iataona Dekapoli senanao 'ediyega ga 'iapwesa Galili olana 'enaya.

32 \*Ga 'ebweu tai sime'ena Yesu 'enaya tauna totenatui ta wate meya lidolidona ga Yesu sisidena be 'aene 'ida gitoo be 'ida bobo'ana.

33 Ga Yesu tai nina 'i'au'ewena ga boda 'ediyega siadumaduma taudimo, ga Yesu nima matagigina

---

\* 7:25-26: Mk 9:17-18      \* 7:29: Yo 4:50-51      \* 7:32: Mk 5:23

tai tenanaya 'isa'u luguyedi ga muliyega tauna  
nimana 'igiwalina ga tai meyana 'igitoona,

<sup>34</sup> 'enega Yesu 'i'itatu'e galewaya ga 'atenuwa  
'ole'oleyega 'ionaona, 'igwae, “Epapata”, nate  
'ana gibui “'Uebwale.”

<sup>35</sup> 'Enega tai nina tenana 'iebwalebwaledi ta  
wate meyana ni'atu 'ipalupalu be kapekapeyana  
'iona ta 'inono palupalu.

<sup>36</sup> 'Enega Yesu tomota 'i'etobodedi be 'aene  
geya'abo yaita 'ena sida simasimane. Ta 'etoboda  
nina nigeya sinoono, ta esi siemwaemwasala  
dadanei tomota 'ediya.

<sup>37</sup> Ta taudi ni'atu sinonona, nuwadi 'iowana  
sinabwana ga sigwae, “'Ina guinuwa maibo'ana  
bobo'ana ta 'ebe nuwaowana, manuna totenatui  
'igienonoedi ta tomeya lidolido 'igie palupaludi  
be sioona.”

## 8

### *Yesu boda 'ie'enidi* (Madiu 15:32-39)

<sup>1</sup> Tuta gote 'ena boda sinabwana wate siegog-  
onama Yesu 'enaya ta nigeya 'adi masulamo.  
'Enega 'ina tononoyao 'ibwauyedima ga 'ieonedu,  
'igwae,

<sup>2</sup> “Tomota getedi ya'atenuwa 'ole'oleyedi  
manuna ni'atu 'asiyata 'etoi bada ma'egwao  
'amiyami ta nigeya 'adi masulamo.

<sup>3</sup> 'Enega 'eguma mabotanidi yaetune iledi  
'etamo 'edaya sitatai, manuna 'aidi 'edasolega  
simai.”

4 'Enega Yesu 'ina tononoyao sieonena, sigwae, “Mwa'adega sena mwatui daita 'ena tomota yaudi getedi 'adi masula taloba'ese?”

5 Ta Yesu 'ienaidedi, 'igwae, “'Eisa 'ami belediyao simiyami?” Ga sigwae, “Sebeni namo.”

6 'Enega boda 'iloinedi be bale'uya simiyatowa, ga beledi sebeni nidi 'i'ewedi ta manudi 'iona lokagutoki Yaubada 'ena, ga 'igitomwedi ga 'ina tononoyao 'i'ebwa'edi be tomota 'ediya sieguyai, ga sieguyai sakowasiyedi.

7 Ta 'aina iyana gidalidi wate simiyami, 'enega manudi Yesu 'iona oboboma, ga 'ina tononoyao 'iloinedi be sieguyaiyedi wate tomota 'ediya.

8 'Enega maibo'adi si'ai ga gamwadi 'ipawa, ga muliyega masula tupwatupwadi siegogonedi ga kodo sebeni siloemaedi.

9\*Ta boda nidi 'adi yau powa tausani nadigega.

10 'Enega 'ietune ilediya, ga ma ina tononoyao silomanini ga 'idi waga sigeluna ga Dalimanuta senanaya sitauya.

*Palisiyao nuwanuwadi we'iwe'iyaya sida 'ita*

11 \*'Enega Palisiyao simai ga Yesu 'ena siegewagewana ga sitoona be 'aene we'iwe'iyaya 'ebweu 'ida guinuwe manudi be sida 'awa'ai'aile 'aene 'ina waiwai Yaubada 'enega 'imai.

12 Ta Yesu ma ina nuwamwau 'ieonedi, 'igwae, “Mwa'adega ga 'enega 'epata gete 'omi nuwanuwami we'iwe'iyaya, ta esi geya'abo 'ebweu wate we'iwe'iyaya wa'ita'ita.”

13 'Enega 'ipilisinedi ga wagaya 'igelu limana ga siabala mali senaya.

\* 8:9: Mk 6:44 \* 8:11: Md 12:38; Yo 6:30

*Elodi be Palisiyao 'idi e'ita nadigega beledi 'ana 'ebe gieseseya*

*(Madiu 16:5-12)*

<sup>14</sup> Ta 'adi 'abwaga nigeaya si'ewa'ewa manuna sinuwa pupuledi, ta beledi 'ebweuna namo wagaya 'itupwa.

<sup>15</sup> \*Ga Yesu 'iemataluwedi, 'igwae, “Palisiyao be Elodi 'adi beledi 'ana 'ebe gieseseya 'enega wa'ita'i'isimi.”

<sup>16</sup> 'Enega tonono nidi taudimo 'ediya sigwae, “Nai Yesu 'ina ona 'alena gete, manuna 'ada 'abwaga tanuwa pupulena.”

<sup>17</sup> \*Ta Yesu 'idi nuwanuwa ni'atu 'imwalatonina ga 'ieonedi, “To'ase manuna waonaona 'aene nigeaya 'ami 'abwagamo? Nate nigeaya manuna yaonaona. Mwa'adega 'imi nuwanuwa sipotaya ga nigeaya sawesawenaya be 'igu ona wasinapudi.

<sup>18</sup> Mamatami ta sa'i nigeaya wa'ita'ita, ta wate matenami ta sa'i nigeaya wanoono, 'enega geya'abo wanuwanuwa'i'isi 'igu guinuwa pwaluyao 'adi 'e'ai manuna aga?

<sup>19</sup> \*Tuta nina beledi nima 'enega tomota paibi tausani yae'enidiya, ta tupwa 'eisa kodo waegogonedi?” Ga sigwae, “Tuwelo.”

<sup>20</sup> \*Ta Yesu 'ienaida wate, 'igwae, “Ga tuta nina beledi sebeni 'enega tomota powa tausani yae'enidiya ta tupwa 'eisa kodo waegogonedi?” Ga sigwae, “Sebeni.”

<sup>21</sup> 'Enega Yesu 'igwae, “Ona'ai'aila, ta 'omi sana nuwami nigeaya 'isabwasabwalena.”

---

\* **8:15:** Lu 12:1    \* **8:17:** Mk 6:52    \* **8:19:** Mk 6:41-44    \* **8:20:** Mk 8:6-9

*Yesu tomata kebokebo 'igie bobo'anena*

<sup>22</sup> 'Enega Beteseida 'ena simai, ga tai tomata kebokebo tomota si'au'ewena Yesu 'enaya, ga sisidena be 'aene 'ida gitoo be 'ida bobo'ana.

<sup>23</sup> Ta Yesu tomata kebokebo nina nimanaya 'igiyaina ta 'i'au'ewena, ga 'asa nina 'enega siapwesa. 'Enega Yesu tai nina matana 'igiwaliidi ta nimanega matana 'igitoodi ga 'ieonena, “Sawesawenaya to'ase 'u'itadi?”

<sup>24</sup> 'Enega tai nina 'ilo'ita dadana ga 'igwae, “Tomota ya'litedi, ta 'adi 'ita 'atuwa nadigega kaiwe siloopili dadana.”

<sup>25</sup> Ta 'enega Yesu wate tai nina matana 'igitoo limedi, 'enega 'idune ga matana si'esasa 'ai'ailidi, ga yage yauna 'i'litedi.

<sup>26</sup> 'Enega Yesu 'ietunena, 'igwae, “Geya'abo 'uilaila 'asa sinabwana 'enaya, ta esi 'utatauya tauyo 'imu anuwaya.”

*Pita 'isimana Yesu manuna  
(Madiu 16:13-20; Luke 9:18-31)*

<sup>27</sup> Gote 'ena Yesu ma ina tononoyao sitautauya Sisalia Pilipai 'asanao manudi, ga 'edaya 'ina tononoyao 'ieonedi, 'igwae, “Mwa'adega tomota 'idi ona manugu 'aene 'abo'agu yaita?”

<sup>28</sup> Ga tonono nidi sigwae, “Tomota 'aidi siona 'aene 'oyo Yoni togiebapitaiso, ta 'aidi sigwae 'aene 'oyo Ilaitiya, nai gimipalopita 'ebweu tuga.”

<sup>29</sup> \*'Enega wate 'ienaidedi, 'igwae, “Ta 'omi mwa'adega 'imi nuwanuwa 'aene 'abo'agu yaita?” 'Enega Pita 'ilolagata ga 'igwae, “'Oyo Keliso, To'etoseyana niyo.”

---

\* 8:29: Yo 6:69



<sup>30</sup> Ta Yesu 'iloina pa'aledi, 'igwae, “Geya'abo 'ebweu yaita 'ena wasimasimanegu.”

*Yesu 'isimana 'ina 'elouya ta 'ina mwawasa manudi*

*(Madiu 16:21-28; Luke 9:22-27)*

<sup>31</sup> Ta wate 'ilolagata be to'ase ma'etamo 'ilobai 'ie'itaena 'ediya, 'igwae, “'Abo'agu Tomota Natuna ma'etamo 'elouya sinabwana yaloba. Manuna 'inapwanao be totaliyao sinabwadi be loina 'ana toe'itao 'iabe sie'idi'idiyegu be siloemwawasigu ta 'asiyata 'etoi mulinaya yada toololimana.”

<sup>32</sup> Yesu 'ina ona gete 'enega 'isa'uapwese 'ai'ailina 'ina mwawasa manuna. 'Enega Pita Yesu ma'alenaya 'itauyena ga 'i'etobodena be 'aene geya'abo yage nidi siapweapwesa Yesu 'enaya.

<sup>33</sup> Ta Yesu 'iasakowasi ga 'ina tononoyao 'iduneduneyedi ga 'i'enapa'ala Pita 'ena, 'igwae, “'Oyo Seitani, gete tuga 'upilisinegu! Manuna 'imu nuwanuwa tomota 'idi nuwanuwa, ta nige ya Yaubada 'ina nuwanuwa nadigega.”

<sup>34</sup> 'Enega Yesu boda maibo'adi be 'ina tononoyao ma'ediyao 'ibwauyedima ga 'ieonedi, 'igwae, “Yaita 'eguma nuwanuwana be 'imuliyegu, 'ilobwenena be tauna 'ina nuwanuwa 'ida guitoyase be tauna 'ana kelose 'i'aali be 'enega 'imwamwawasa, nate nadigega 'agu muliya nina 'ana 'eda.

<sup>35</sup> “Ta 'eguma yaita yawasina 'iegagale, ma'etamo yawasi nina 'iloseye. Ta 'eguma yaita manugu be tetela bobo'ana manuna

yawasina 'itagwale be 'imwamwawasa, tauna 'iabe yawasina bobo'ana 'iloba.

<sup>36</sup> “'Eguma 'ida esaesao bale'uya sinabwa wawasae talobadi nate yage besobeso, ta esi yage sinabwana nate yawasida bobo'ana.

<sup>37</sup> Manuna 'eguma yawasida bobo'ana taloseyedi, nigeaya 'ebweu wate 'ana lopa'elu 'imiyami.

<sup>38</sup> \*“'Abo'agu Tomota Natuna, ta 'abo yaita 'oyo manugu 'uomayamaya ta wate 'igu e'ita manuna 'uomayamaya be 'ueyaseyaseyegu 'epata gete to'umalidi ta sogasogalidi matadiya, ma'etamo yada eyaseyaseyo, tuta nina Tamagu 'ina esaesa tuyatuyayalina 'enega yaila limanama, ta wate aneloseyao ma'egwao.

## 9

<sup>1</sup> “Ta Yesu 'ieonedi wate, 'igwae, “Yaona 'ai'aila 'emiya 'aene tomota 'aimi geya'abo wamwawamwawasa ga 'ana laba Yaubada 'ina lolina waiwaina 'ida apwesa be wada 'ita.”

*Yesu 'ana 'ita dumadumana  
(Madiu 17:1-13; Luke 9:28-36)*

<sup>2</sup> \*'Asiyata sikisi mulinaya Yesu 'ina tononoyao 'etoi 'i'au'ewedi, taudi Pita be Yemesa be Yoni, ga ma'ena situ'e 'oya 'ebweu kesolana 'enaya, ga taudimo simiyami; ga si'itena Yesu maninina 'ituyayala,

<sup>3</sup> ta 'ana 'oama 'iwakeke 'ai'ailina, 'ana 'ita nigeaya 'ebweu yaita bale'uya sawesawenaya be

---

\* **8:38:** Md 10:33      \* **9:2:** Mk 5:37

'oama 'ida 'gie'esase be 'ana wakewakeke nadi-gega.

<sup>4</sup> Ta wate Ilaitiya be Mosese siapwesama ga Yesu nina ma'edi si'awa'awa gwae.

<sup>5</sup> 'Enega Pita 'ilolagata ga Yesu 'ieonena, 'igwae, "Inapwana, 'ida miya gete nadigega bobo'ana, 'enega 'imi yoeyoe 'etoi 'a'abidi, 'ebweuna 'oyo manuyo, ta 'ebweuna Mosese manuna, ta 'ebweuna Ilaitiya manuna."

<sup>6</sup> Nate Pita 'ionaona besobeso tuga, manuna magosenao simatauta.

<sup>7</sup> \*'Enega pwana wate 'imwa'uta ga 'itala ekabobodi, ta pwana 'enega 'ebweu 'enana sinonona, 'igwae, "Gete natugu bobo'ai'ailina, 'ina onao wada nonodi."

<sup>8</sup> Ta silomanini ga silo'ita dadana ga Yesu tebweuna namo, ta nigeya 'ebweu wate yaita si'ita'ita.

<sup>9</sup> 'Enega 'oyega siebuebusima ga Yesu 'iloinedi, 'igwae, "Yage nidi ni'atu wa'itediya geya'abo tomota 'ediya wasimasimani ga 'ana laba 'abo'agu Tomota Natuna mwawasega yatoolo li-mana."

<sup>10</sup> 'Enega yage nina sisa'u kwaiyena, ta taudimo sionaona, sigwae, "Ina ona nina toololimana manuna mwa'adega 'ana mwalato?"

<sup>11</sup> Ga Yesu 'ena sienaida wate, sigwae, "To'ase manuna lolina 'ana toe'itao siona 'aene Ilaitiya 'igimi nuganama be muliyega To'etoseyana nina 'imama?"

<sup>12-13</sup> \*Ta Yesu 'igwae, "O nadigega, Ilaitiya 'aene 'ida giminuganama be 'enega yage maibo'adi

\* 9:7: Md 3:17; 2 Pi 1:16-18

\* 9:12-13: Mal 4:5; Ais 53:3

'ida giepaepaludi. Ta sa'i Ilaitiya nina ni'atu 'imai saba, ta esi tomota siguinuwa besobeso 'enaya to'ase 'idi nuwena nadigega, nadigega Buki Tabu 'igimi simana'esena. Ta wate 'abo'agu Tomota Natuna, to'ase manuna Buki Tabu 'igimi simanegu 'aene 'elouya yaudi yalobadi be wate tomota sida guitoyasegu?"

*'Ebweu gwama 'ana le'oasa lobwebwai manuna*

*(Madiu 17:14-20; Luke 9:37-43)*

<sup>14</sup> 'Enega 'oyega simwa'uta ga 'ina tononoyao maibo'adi siloba limedi be boda yaudi ma'ediyao, ta wate lolina 'ana toe'itao wate ma'ediyao siegewagewana.

<sup>15</sup> Ga tuta nina pwalu Yesu si'inanena nuwadi 'iowana sinabwana, ga 'enaya sipili manini sabi 'itana.

<sup>16</sup> Ta Yesu 'idi egewagewana manuna 'ienaida, 'igwae, "To'ase manuna waonaona?"

<sup>17</sup> Ga 'ebweu tai boda nidi 'ediyega Yesu 'ieonena, 'igwae, "Inapwana, 'idi egewagewana 'alena natugu, manuna 'ina le'oasa 'enega nigeaya kapekapeyana be 'iona,

<sup>18</sup> ta 'aina tuta yaluyaluwa bi'i 'ina guinuwega 'itatai ta 'awanega busobuso siapweapwesa, ta 'iesala'i'ita be 'idededela. Ta 'imu tononoyao ni'atu yasidedi be 'aene yaluyaluwa bi'i gwama 'enega siula apwese, ta nigeaya sawesawediya."

<sup>19</sup> Ta Yesu 'ieonedi, 'igwae, "Omi sana mwa'adega? Ga debami pa'ala yaita! Ni'atu 'imi debapa'ala 'enega yalo'ame'ame. Baga gwama nina wame'e 'eguya be ya'ita."

20 'Enega gwama nina sime'ena 'enaya, ta yaluyaluwa bi'i Yesu 'i'itena, 'enega 'iginao ga gwama 'itai ga bale'uya 'ibe'u ga 'idededela ta 'awanega busobuso siapweapwesa.

21 Ta Yesu gwama tamana 'ieonena, “To tuta 'ena 'ina le'oasa 'ie'ale?” Ga tamana 'igwae, “'Ina tuta gwamega.

22 'Enega 'abo 'itatai 'aina tuta 'ibebe'u kaiwe 'ala'alasidi 'ediya ta 'aina tuta bwasi ni'udi 'ediya be 'iabe 'iloemwawasi. 'Enega 'abo kapekapeyana 'uda 'atenuwa 'ole'oleyema be 'ulemema.”

23 \*Ta Yesu tai nina 'ieonena, 'igwae, “Ni'atu 'uona 'Abo kapekapeyana', aga? Ta esi 'uda nuwa'i'isi 'aene 'eguma taemisa, yage maibo'ana kapekapeyana 'eday.”

24 \*Gote 'ena tai nina 'iona toitoila, 'igwae, “Ona'ai'aila yaemisa, ta nigeya emisa 'ai'aila. Nuwanuwagu be 'igu emisa 'ugiewaiwaiye.”

25 Ta Yesu boda yauyaudi sipilipilima 'i'itedi, 'enega yaluyaluwa bi'i 'i'enapa'alina, 'igwae, “'Oyo yaluyaluwa to'umaliyo 'imu lobwebwai 'enega gwama 'ieuwauwa, yaloineyo be 'upilisine atae be geya'abo wate 'ebweu tuta 'ulugulugu limana 'ena.”

26 'Enega yaluyaluwa nina 'imagamagana ga gwama 'ana lobwebwai 'iginaona ga 'idededela sinabwana, ta yaluyaluwa bi'i 'enega 'iapwesa ga 'itauya. Ta boda gwama si'itena 'ana 'ita 'atuwa 'imwawasa, ga simatauta ta sigwae, “Ni'atu 'imwawasa.”

---

\* 9:23: Mk 11:23      \* 9:24: Lu 17:5

27 Ta Yesu gwama nimana 'igiyaina ga 'igietoolona, ta gwama nina 'itoolo, ni'atu 'ibobo'ana.

28 'Enega muliyega Yesu ma ina tononoyao silugu anuwaya, ga nada taudimo. 'Enega tonono nidi Yesu sieonena sigwae, "Inapwana, mwa'adega 'abo'ama ga nigeya sawesawemaya be yaluyaluwa bi'i 'aula apwese?"

29 Ta Yesu 'igwae, "Nigeya 'ebweu to yage 'enega be yaluyaluwa bi'i taula apwese. Nate namo sidesidega, Yaubada 'enaya."

*Yesu 'ina mwawasa manuna 'isimana  
(Madiu 17:22-23; Luke 9:43-45)*

30 Gote 'enega Yesu ma ina tononoyao sena nina sipilisinena, ta Yesu geya nuwana be boda sida mwalatoni mane 'ena sitautauya, 'enega Galili 'edana 'ena sitauya,

31 ga 'ina tononoyao 'ie'itedi 'ina mwawasa manuna, 'igwae, "Ma'etamo Tomota Natuna\* 'ana totelesipupu 'ida 'ebwayae 'ana talauwalao 'ediya be siloemwawasi, be 'asiyata 'etoi muliyega 'ida toololimana."

32 Ta 'ina e'ita gete manuna nigeya simwalamwalatoni, ta esi nigeya 'idi 'Inapwana 'ena sienaenaida, manuna simatauta.

*Tonugana taudi tomuliya  
(Madiu 18:1-5; Luke 9:46-48)*

---

\* **9:31: Tomota Natuna:** Yesu tauna 'ieesena The Son of Man, 'ana mwalatoi tomota tuga. Yesu taunamo 'ieesena Tomota Natuna, ta 'ina e'itao 'ediyega tomota simwalatonina 'aene tauna To'etoseyana Keliso.

33 'Enega 'asa Kapaneumi 'ena siapwesa ga anuwaya silugu, ga nada Yesu 'ienaida 'ina tononoyao 'ediya, 'igwae, “To yage manuna waegewagewana 'eday?”

34 Ta siomayamaya ga nigeaya sieel'isa, manuna 'idi egewagewana 'alena nate yaita 'ediyega 'ida anugana.

35 \*'Enega Yesu 'imiyatowa ga site tuwelo 'ibwauyedima ga 'ie'ita 'ediya, 'igwae, “'Abo yaita 'oyo nuwanuwayo be 'emiyega 'ue'lapwana, 'ilobwenemu be tauyo 'ugimwa'uteyo be 'uetoguinuwa gosemwao manudi.”

36 \*Ta 'ebweu gwama 'i'au'ewenama ga gamwagamwanidiya 'ietoolona ta 'i'atubwailina ga 'ieonedi,

37 'igwae, “'Eguma yaita 'oyo gwama gete nadigega 'uobobome manugu, nate 'abo'agu wate 'uobobomegu, ta nigeaya 'aene taugumo 'uobobomegu, ta wate 'agu toetune Yaubada ma'iyagu 'uobobomema.”

*'Abo yaita tauna nigeaya 'ietaetalauwaleda tauna 'ilemelemeda  
(Luke 9:49-50)*

38 \*Ta Yoni 'ilolagata ga 'igwae, “'Inapwana, 'ebweu tai 'a'itena 'amu esanega yaluyaluwa bi'i 'i'ulaula apwesedi, 'enega 'a'etobodena, manuna tai nina nigeaya 'ida boda.”

39 Ta Yesu esiya 'igwae, “Geya'abo wa'eto'etobode. Manuna 'abo 'ebweu yaita yage

---

\* 9:35: Mk 10:43-44; Lu 22:24 \* 9:36: Yo 13:20 \* 9:38: Num 11:27-29

waiwaidi 'agu esanega 'iguiguinuwedi, geya'abo 'ebweu wate 'isinasinligu.

<sup>40</sup> \*Manuna 'eguma yaisigedi nigeya sietaeta-lauwaleda taudi silemelemeda.

<sup>41</sup> “Ta wate wada nuwa'i'isi 'aene 'eguma tona'ami 'iyapayapasa be 'ebweu yaita 'ienumami manuna 'omi Keliso 'ina bodao, tauna 'ana pali bobo'ana ma'etamo 'iloba.

*To'ase 'igie to'umaliyeda  
(Madiu 18:6-9; Luke 17:1-2)*

<sup>42</sup> “Ta esi 'eguma yaita 'itoo be 'agu toemisao gogama getedi 'ediyega 'ebweuna 'igie be'uye, tai nina nai waine nina 'ilobwenena be gulewa sinabwana 'otonaya silosipwa be magulewana siula mwa'utedi ni'uya.

<sup>43</sup> “Wate 'eguma nimayo 'igie be'uyeyo 'ilobwenena be 'u'upwa yaule. Nate nigeya 'ana to'umalinamo 'eguma manima 'upwa'upwayo ta yawasiyo bobo'ana 'uloba. Ta esi to'umali wawasae 'emuya 'eguma manima luwaluwayo siula mwa'uteyo kaiwe 'ala'alata atayana 'enaya.

<sup>44</sup> (-)

<sup>45</sup> “Be wate 'eguma 'aeyo 'igie be'uyeyo 'ilobwenena be 'u'upwa yaule. Nate nigeya 'ana to'umalinamo 'eguma ma imu lopegoi ta yawasiyo bobo'ana 'uloba. Ta esi to'umali wawasae 'emuya 'eguma ma'ae luwaluwayo siula mwa'uteyo 'asagabugabu 'ena.

<sup>46</sup> (-)

<sup>47</sup> “Matayo wate nadigega, 'eguma 'igie be'uyeyo 'u'iwa yaule tuga, manuna nigeya

---

\* **9:40:** Lu 11:23



'ebweu wate 'ana to'umalinamo 'eguma mamata 'ebwe'ebweuyo ta Yaubada 'ina 'ebe lolina 'uloba. Ta esi to'umali wawasae 'emuya 'eguma mamata luwaluwayo siula mwa'uteyo 'asagabugabu 'enaya.

<sup>48</sup> Sena nina 'ena kokowa 'ediya ipwaipwa sisopisopila ataya, be wate kaiwe nigeya 'ida kweu.

<sup>49</sup> “'Enega tomota maibo'adi 'awesabelulu 'ida giebobob'enedi, nadigega ola masula 'igie bobob'anena.

<sup>50</sup>\*“Ola yage bobob'ana. Ta 'eguma 'ana lotoona 'isasawala, nigeya sawesawenaya be 'ibobob'ana limana. 'Enega 'ilobwenemi be 'imi bubuna taumi walotoona 'ana dibidibi nadigega waeobobobomemi 'ebweuna 'ebweuna 'enaya.”

## 10

### *Sa'ila manuna* (Madiu 19:1-12)

<sup>1</sup> Ga Yesu sena nina 'ipilisinena ga Yudia 'ina senaya 'itauya ga 'iabala bwasi Yolidani mali esenaya, ga boda sinabwana siegogonama 'enaya, ta 'enega 'ina bubuna nadigega 'ie'ita 'ediya.

<sup>2</sup> Ta Palisiyao simai ga nuwanuwadi be Yesu sitoo, 'enega 'ena sienaida, sigwae, “'Inapwana, mwa'adega 'ida lolina sa'ila manuna? Kapekapeyana be tai mwanena 'isa'ilei?”

<sup>3</sup> Ta Yesu 'igwae, “Mwa'adega Mosese lolina 'i'ebwaya'esemi?”

---

\* **9:50:** Lu 14:34; Kol 4:6; 1 Te 5:13

<sup>4</sup> \*Ga Palisiyao sigwae, “Mosese 'itagwala be 'abo tai nuwanuwana be 'isasa'ila, nugana pwep-wai 'ena 'ina guitoyasa 'isimane be mwanena 'i'ebwa'e ta 'enega 'isa'ile.”

<sup>5</sup> Ga Yesu 'ieonedi, 'igwae, “Mosese lolina nate 'i'etoladina 'omi 'imi debapa'ala manuna.

<sup>6</sup> \*Ta esi wada nuwa'i'isi Yaubada 'ina mweluluwa 'unu 'enega tomota 'eluwa 'imweluluidi, me'olotona ta mewainena.

<sup>7</sup> \*Gete 'alena 'enega tai tamana be sinana 'ida pilisinedi be mwanena ma'iyana simiyaluwa,

<sup>8</sup> be siteluwa nidi oodi 'ebweuna tuga. Lowa siteluwa nidi simiya dumaduma ta gete tuga ni'atu sie'ebweu.

<sup>9</sup> Yaubada ni'atu 'isa'u luwedi 'enega geya'abo 'ebweu yaita 'iemiya dumedumedi.”

<sup>10</sup> 'Enega muliyega Yesu ma ina tononoyao siilama anuwaya ga tonono nidi sienaida limana sa'ila manuna.

<sup>11</sup> \*'Enega Yesu 'ieonedi, “'Eguma yaita tai mwanena 'isa'ile be 'iaibala mali waine 'ena, tai gete gimimwanena 'ena 'iguinuwa to'umalina, manuna 'iloelata.

<sup>12</sup> Ta wate 'eguma waine mwanena 'isa'ile be 'iaibala mali tai 'ena, waine nina 'iloelata.”

*Yesu gogama 'iona obobomedi  
(Madiu 19:13-15; Luke 18:15-17)*

<sup>13</sup> Ta 'enega tomota gogama sime'edi Yesu 'enaya be 'aene 'ida gitoodi. Ta 'ina tononoyao esi gogama nidi si'etobodedi.

---

\* **10:4:** 2 Loi 24:1      \* **10:6:** Nug 1:27      \* **10:7:** Nug 2:22-24; Ep 5:31      \* **10:11:** 1 Ko 7:10-11

14 \*Ta Yesu 'ina tononoyao 'i'itedi ga 'ienapa'aledi, 'igwae, “Geya'abo gogama wa'eto'etobodedi, ta esi wada tagwaledi be 'eguya sida mai, manuna gogama getedi nadigega Yaubada 'ina 'ebeloina 'ilobwene 'ai'ailidi.

15 Manuna 'abo yaisigedi taudi geya'abo gogama getedi nadigega 'idi emisa, geya'abo sa'i Yaubada 'ina 'ebeloina 'ena silugulugu.”

16 'Enega Yesu gogama nidi 'i'aalidi ta 'igitoodi ga 'iona obobomedi.

*Esaesa manuna  
(Madiu 19:16-30; Luke 18:18-30)*

17 Ga Yesu 'itoolo be 'aene 'itatauya, ta 'ebweu tai 'ipilima ga 'i'aetulasa Yesu matanaya ta 'igwae, “'Inapwana, yamwalamwalatoni 'aene 'oyo toe'ita bobo'ana, 'enega to'ase yada guinuwe be 'enega yawasigu ataya yaloba?”

18 Ga Yesu tai nina 'ieonena, 'igwae, “Mwa'adega ga 'enega 'u'awa bobo'anegu? Manuna nigeya 'ebweu yaita bobo'ana; nate namo Yaubada.

19 \*Ta Yaubada 'ina loinao ni'atu 'umwalamwalatonidi, nate 'aene:

Geya'abo loemwawasa.

Geya'abo loelata.

Geya'abo 'ipwala.

Geya'abo simana kabokabo.

Geya'abo kaboega tomota 'idi gwegwe 'u'ewa'ewadi.

Ta wate tamayo be sinayo 'uda 'amayabedi.”

---

\* 10:14: Md 18:2-3      \* 10:19: Sia 20:12-17

20 Ga tai nina 'igwae, “'Inapwana, 'igu tuta gwamega ga batuwa lolina nidi getedi yamuliya 'ai'ailede.”

21 \*\*'Enega Yesu ma ina gwausowala tai nina 'iduneyena ta 'igwae, “Nate namo 'ebweuna yage 'ilogege semu. 'Enega 'uila 'imu 'asaya be 'imu gwegwe maibo'adi 'uegimwaneyedi be 'adi maisa 'ueguyaiyedi togomabeso 'ediya, ta 'enega 'umamai be 'umuliyegu, be 'enega ma'etamo 'imu esaesa galewaya 'uda loba.”

22 Ona gete tai nina 'inonona ta 'ina esaesa sinabwana 'iegagalena, 'enega nuwana 'imwau 'ai'aila, ta 'iila.

23 'Enega Yesu 'ilo'ita dadana ga 'ina tononoyao 'ieonedi, 'igwae, “'Abo yaisigedi ma idi esaesa sinabwana 'idi lugu Yaubada 'ina 'ebeloina solanaya mwauna.”

24 Ta 'ina tononoyao nuwadi 'iowana 'ina ona gete manuna. 'Enega Yesu 'ieonedi, 'igwae, “Natugwao, Yaubada 'ina 'ebeloina 'ana lugu mwau wawasae.

25 Ona'ai'aila kameli tauna yobai sinabwana, 'enega tupwana mwauna be siyaluma 'ana lobwalena 'enega 'ilulugu, ta esi toesaesao 'idi lugu Yaubada 'ina 'ebeloina 'enaya mwau wawasae.”

26 Yesu 'ina ona gete manuna 'ina tononoyao sinuwa owana wawasae ga sieonena, “'Eguma gete nadigega, yaita sana sawesawenaya be 'ebe gwausowala 'iloba?”

27 \*'Enega Yesu 'iduneyedi ga 'igwae, “Yage gete mwau wawasae tomota 'ediya, ta esi nige ya

---

\* 10:21: Mk 8:34    \* 10:21: Mk 4:18-19    \* 10:27: Lu 1:37

mwauna Yaubada 'enaya, manuna Yaubada 'enaya yage maibo'ana kapekapeyana.”

28 \*'Enega Pita 'ilolagata ga 'igwae, “'Inapwana, 'abo'ama mwa'adega? Manuna 'ima gwegweyao maibo'adi ni'atu 'apilisinedi ta 'amuliyemu.”

29 Ta Yesu 'igwae, “Ona'ai'aila, 'eguma yaisigedi 'omi 'imi anuwao, tasimiyao, nuumiyao, sinamiyao, tamamiyao, natumiyao be 'imi bwa'ao wate wapilisinedi, ta wate 'elouya wada loba manugu be tetela bobo'ana 'ana simana manuna,

30 'ami e'isa gete tuga wada loba nadigega analedi anuwao, tasimiyao, nuumiyao, sinamiyao, natumiyao be 'imi bwa'ao, ta wate ma'etamo galewaya yawasimi ataya waloba.

31 Ta gete tuga toanuganao yaudi ma'etamo sida muliya be taudi simulimuliya ma'etamo sida nugana.”

*Yesu 'ina mwawasa 'ana simana 'etonina  
(Madiu 20:17-19; Luke 18:31-34)*

32 \*'Enega ma'etamo 'edaya situ'etu'e Yelusalema manuna, ga Yesu 'inuganugana ta 'ina tononoyao simulimuliya, be ma idi nuwaowana, ta 'aina tomota wate ma idi matauta 'edaya simulimuliyedi. 'Enega 'ina tononoyao site tuwelo nidi 'ibwau egogona limedi ga 'iemataluwedi to'ase 'iabe 'iapwesa 'enaya,

33 'igwae, “Gete tuga tatu'etu'e Yelusalema. 'Abo'agu Tomota Natuna ta 'agu tosipupu nina 'ida telesipupuyegu totaliyao sinabwadi be lolina 'ana toe'itao 'ediya, be 'igu mwawasa manuna

\* **10:28:** Mk 1:16-20; Lu 5:28      \* **10:32:** Mk 8:31, 9:31

sida lolina, be muliyega sida 'ebwayaegu taudi nigeya me Yudia 'ediya,

<sup>34</sup> be sida tuyeyegu be sigiwaligu be balaeyega sisapigu be 'enega siloemwawasigu, be 'asiyata 'etoi yatoolo limana.”

*Yemesa be Yoni 'idi sida Yesu 'ena  
(Madiu 20:20-28)*

<sup>35</sup> 'Enega Yemesa be Yoni, taudi Sebedi natunao, Yesu 'ena simai ga sieonena, sigwae, “'Inapwana, 'amai sabi sida 'emuya.”

<sup>36</sup> Ga Yesu 'igwae, “To'ase nuwanuwami be yada guinuwa manumi?”

<sup>37</sup> Ta sigwae, “Ma'etamo 'imu 'ebeloina 'ena nuwanuwama be selabemuya 'ada miyatowa, 'ebweu 'ataimuya ta 'ebweu gegeumimuya.”

<sup>38</sup> \*Ta Yesu 'ieonedi, 'igwae, “'Omi 'imi sida gete 'ana mwalatoi nigeya wamwalamwalatoni. Mwa'adega 'elouya keigana 'enega yanunuma, kapekapeyana be 'omi wate 'enega wanunuma? Ta wate bapitaiso mwauna nina ma'etamo yaloba, mwa'adega 'omi wate nadigega sawesawemiya be wada bapitaiso'esa?”

<sup>39</sup> \*'Enega sigwae, “Sawesawemaya.” Ta Yesu 'igwae, “Ona'ai'aila, keiga nina 'enega yanunuma 'omi wate 'enega wanunuma, be wate bapitaiso nina 'enega 'iabe yada bapitaiso 'omi wate 'enega wada bapitaiso,

<sup>40</sup> ta esi nigeya sawesaweguya be yaesinuwa yaisigedi ma'etamo 'igu etoloina 'enaya 'ataiguya be gegeumiguya sida miyatowa, manuna Yaubada tauna 'ina 'ebeloina be 'iesinuwa.”

\* **10:38:** Mk 14:36      \* **10:39:** Gu 12:2; Et 1:9

41 Ta tononoyao site sanau Yemesa be Yoni 'idi sida sinonona ga sigamwasowaledi.

42 'Enega Yesu maibo'adi 'ibwau egogoned-ima ga 'ieoned, "Omi wamwalatonina taudi bale'uya sieesedi 'aene 'inapwanao 'idi tomo-taiyao siloiloina pa'aledi.

43 \*Ta 'omi geya'abo wate nadigega taudi waguiguinuwa'esa. Ta 'eguma yaita 'oyo nuwanuwayo be 'emiyege 'uetoloina 'ilobwenemu be gosemwao manudi 'uda etoguinuwa.

44 Ta wate 'eguma yaita 'oyo nuwanuwayo be 'emiyege 'uetoanugana, 'ilobwenemu be gosemwao maibo'adi manudi 'uetopaisewa.

45 \*"Ta 'abo'agu Tomota Natuna\* yamai bale'uya nigeya 'aene tomota manugu siguinuwa, ta esi sabi guinuwa tomota manudi, ta wate yatagwalegu be yamwamwawasa tomota maibo'ami 'ami etoli'ama manuna."

*Batimio matana 'i'esasedi  
(Madiu 20:29-34; Luke 18:35-43)*

46 'Enega simai Yeliko 'ena, ga tuta nina Yesu ma ina tononoyao Yeliko sipilisinena, boda sin-abwana si'oayabudi, ga tomata kebokebo 'ana esana Batimio silobena, tauna Timio natuna, ta tuta yauna 'eda tupitupinaya 'imiyami ta 'iesidasida mani be gwegwe manudi.

---

\* **10:43:** Mk 9:35      \* **10:45:** 1 Ti 2:5-6      \* **10:45:** *Tomota Natuna:* Yesu tauna 'ieesena The Son of Man, 'ana mwalatoi tomota tuga. Yesu taunamo 'ieesena Tomota Natuna, ta 'ina'itao 'elediyega tomota simwalatonina 'aene tauna To'etoseyana lKeiso.

47 \*Ga Batimio nina ale 'inonona 'aene Yesu goma Nasaleta 'itautauya, 'enega Yesu 'ena 'ibwau, 'igwae, “Yesu ye, 'oyo Debida 'ina susu, 'uda 'atenuwa 'ole'oleyegu!”

48 'Enega tomota maibo'adi Batimio nina si'etobodena, sigwae, “Ulosa'u! Tuwa bwau!” Ta tuga 'ibwau toitoila, 'igwae, “Debida tubuna ye, 'uda 'atenuwa 'ole'oleyegu.”

49 'Enega Yesu 'itoolo, ta 'iona, “Wada bwauye-nama.” Ga tomota sigwae, “Bobo'ana, 'utoolo. Yesu 'ibwauyemu.”

50 'Enega 'ana tala'apwala 'i'ewa yaulena ga 'itoolo manini, ga Yesu 'ena 'imai.

51 Ta Yesu 'ieonena 'igwae, “To'ase nuwanuwayo be manuyo yada guinuwe?” Ga tomata kebokebo nina 'igwae, “'Inapwana, kapekapeyana be matagu 'uda gie'esasedi?”

52 \*'Enega Yesu 'ieonena, 'igwae, “Bobo'ana! Gete tuga 'imu emisa 'enega matayo 'i'esasedi ni'atu.” Gote 'ena matana 'i'esasedi, ga 'edaya Yesu 'imuliyena.

## 11

*Yesu 'ina lugu Yelusalema 'ena*

*(Madiu 21:1-11; Luke 19:28-40; Yoni 12:12-19)*

1 'Enega situ'etu'e Yelusalema manuna ga 'asa gidalidi Betani ta Betipegi selabediya silogel-ogedo, nate 'oya Olibe 'agalaunaya, ta Yelusalema nuganidiya tupwana 'edasola. 'Enega Yesu 'ina tononoyao 'eluwa 'igimi etunedi sena nidi gidalidi 'ediya ma 'adi emataluwa,

---

\* 10:47: Md 9:27      \* 10:52: Mk 5:34



<sup>2</sup> 'igwae, “Watauya 'asa gote matamiya 'enaya, ta 'eguma waapwesa 'asa nina matanaya, yobai 'ebweu wa'italoba kaiwe 'ena silosipwena, nate ase mwaneyauna, tauna nigeya tomota sida gelu toona. Yobai nina wali'ami be wame'e.

<sup>3</sup> Ta 'abo 'ebweu yaita 'ienaida 'emiya be 'igwae, “To'ase manuna nate yobai nina wali'ali'ami?” tai nina waeona, “Inapwana nuwanuwana, be tuta kukupana namo be 'ida etune ilenama.’ ”

<sup>4</sup> 'Enega site luwa nidi sitauya 'asa nina 'enaya ga yobai ase silobena anuwa mata'awaninaya, ta kaiwe 'ena silosipwena, 'enega sie'ale be sili'ami.

<sup>5</sup> Sili'ali'ami ta 'aina tomota sitootoolo selabediya sigwae, “To'ase manuna nate yobai nina wali'ali'ami?”

<sup>6</sup> Ta site luwa nidi sigwae, “Inapwana nuwanuwana, be tuta kukupana namo be 'ida etune ilenama,” ga 'ediya sitagwalena.

<sup>7</sup> Ta yobai nina si'ewena ga sitauyena Yesu 'ena, ga 'adi 'oamega gwauna siloesona, 'enega Yesu 'igelutu'e, ga 'itautauya.

<sup>8</sup> Ta boda yaudi wate 'adi 'oamao 'edaya siesodi, ta 'aidi kaiwe nalidi mayawadi siguledi 'eda 'ana eiyala manuna.

<sup>9</sup>\*Ta 'aina boda Yesu sianuganena ta 'aina boda siamuliya, ga maibo'adi silotuputupu ta sibwaubwau, sigwae, “Kamatoki 'Inapwana, Yaubada 'ana esanega 'umai sabi 'etoseyema.

<sup>10</sup> 'Ebeloina tubumao Debida 'enega 'iapwesa limanama. Gete manuna Yaubada Toloetana sana 'atuputupu.”

---

\* **11:9:** Sam 118:25-26

11 Ga Yesu ni'atu Yelusalema 'ena 'iapwesa ga Anuwa Tabu 'ena 'ilugu, ga yage yauna Anuwa Tabu solanaya 'iduneyedi, ta ni'atu 'asuinuwanuwa, 'enega ma ina tononoyao site tuwelo siila Betani ga nada si'eno.

*Yesu kaiwe 'ebweu 'iba'ena  
(Madiu 21:18-19)*

12 Ga tomwa 'iulisina ga sitoolo ga Betaniyega siilaila limana Yelusalema manuna, ta Yesu 'ibotana,

13 ga 'edasolega kaiwe 'ana 'ita 'atuwa damaya mayawana 'i'itena, 'enega 'inao selabenaya be nuwanuwana 'aene uwanega 'ida loepa'ala, ta esi 'i'itena yawa daisinamo, tuga 'aweuwauwa ma'etamo 'adi tuta.

14 \*'Enega Yesu kaiwe nina 'iba'ena ga 'igwae, “Geya'abo wate 'uuwauwa limana be tomota 'enega si'e'ai.” Ga 'ina ona gete 'ina tononoyao sinonona.

*Yesu togimwane 'ipa'idi Anuwa Tabu solanega  
(Madiu 21:12-17; Luke 19:45-48; Yoni 2:13-22)*

15 'Enega Yelusalema 'ena simai, ga Anuwa Tabu solanaya 'ilugu, ga toegimwaneyao be togimwaneyao solanega 'ipa'i apwesedi, ta mani 'ana toesa'ugelasao 'idi tebeli 'i'aubuiyedi, ta bunebune 'adi toegimwaneyao 'idi 'ebemiya wate 'i'aubuiyedi.

16 Ta wate anuwa solana 'iegagalena be geya'abo tomota ma idi gwegwe sitautauya anuwa solanega.

---

\* 11:14: Mk 11:20

17 \*Ga 'ie'itedi 'igwae, “Nai Buki Tabu 'ena Yaubada 'ina ona si'etoladina wamwalatonina, 'igwae, ‘Igu anuwa sida eese anuwa 'ebe sidasida tomota maibo'adi manudi,’ ta 'omi wagibunina ga 'aene 'imi 'ebe 'ipwala.”

18 \*Ta totaliyao sinabwadi be lolina 'ana toe'itao Yesu 'ina guinuwa gete tetelina sinonona, 'enega sigamwasowalena ga sinuwa edaedadama be sida loemwawasi, ta nige ya sawesawediya, manuna simatautena, ta wate Yesu 'ina e'itao tomota yauyaudi nuwadi 'i'ewena.

19 Ga ni'atu 'iboi, 'enega Yesu ma ina tononoyao 'asa nina siebesinena.

*Kaiwe nina Yesu 'iba'eba'ena 'i'oapelu  
(Madiu 21:20-22)*

20 \*Ta tomwa 'iulisina ga sitoole sabi ila Yelusalema, ga 'edaya sitautauya, ta Yesu kaiwe nina 'iba'eba'enaya si'itena ni'atu yawana maibo'ana si'oapelu.

21 'Enega Pita Yesu 'ina ona 'inuwa'l'isina ga 'igwae, “'Inapwana, 'u'ita kaiwe nina 'uba'eba'enaya ni'atu 'i'oapelu.”

22 Ta Yesu 'ieonedi, 'igwae, “'Eguma 'imi emisa wasa'u Yaubada 'ena, 'omi wate 'imi guinuwa waiwaidi wada guinuwedi.

23 \*Wate yaona 'ai'aila 'emiya 'eguma yaita 'oyo nige ya 'uda enuwanaluwa ta esi 'uemiemisa be to'ase 'uda ona sida apwesa tuga, 'eguma 'oya gote 'uloine be 'ugwae, ‘'Umiya dolo olaya,’ 'imu ona 'ida ematamatane tuga.

\* 11:17: Ais 56:7      \* 11:18: Mk 14:1      \* 11:20: Mk 11:14

\* 11:23: Lu 17:6

24 \*“'Enega yaeonami to'ase waside Yaubada 'ena, wada emisa tuga be ma'etamo wada loba.

25 \*Wate 'abo wasidasida Yaubada 'ena, gosemiyao 'idi loegesiyao wanuwataudi 'abo to'ase 'idi bubuna 'emiya, be gete 'enega Tamami galewaya 'omi wate 'imi loegesiyao 'ida nuwataudi.”

26 (-)

*Yesu 'ina lolina manuna  
(Madiu 21:23-27; Luke 20:1-8)*

27 'Enega ni'atu siilama Yelusalema, ta Yesu Anuwa Tabu solanaya 'iadadana, ga totaliyao be lolina 'ana toe'itao be wate 'inapwanao simai,

28 \*ga Yesu sienaidena, sigwae, “Tai, yaita 'ina loinega ga gete nadigega 'uguiguinuwa'esa?”

29 Ga Yesu 'ieonedi, 'igwae, “Nugana yagimi enaida 'emiya be 'eguma wae'isa, 'abo'agu wate yaeonami 'igu lolina manuna.

30 'Igu enaida gete: Yaita 'ina loinega ga Yoni togiebapitaiso 'iguiguinuwa? Yaubada, nai 'ebweu tomota?”

31 'Enega taudimo 'ediya siegewagewana, sigwae, “'Ina ona mwa'adega tae'isa'ese? Manuna 'abo tagwae, ‘Yaubada 'enega,’ 'iabe 'ieona li-mada be 'igwae, ‘Ta! To'ase sana manuna ga Yoni nigeya waemiemise?’

32 \*Ta 'eguma tagwae, ‘Tomota 'enega,’ 'iabe pwalu sigamwasowaleda.” Manuna tomota yaudi Yoni siemisena 'aene tauna palopita 'ai'aila.

---

\* 11:24: Md 7:7; Yo 14:13-14    \* 11:25: Md 6:14-15    \* 11:28: Yo 2:18    \* 11:32: Md 21:46

33 'Enega Yesu 'ina enaida nigeya sie'ie'isa 'ai'ailli, ta esi sigwae, “Nigeya 'amwalamwalatoni.”

Ta Yesu 'ieonedi, 'igwae, “'Abo'agu geya'abo wate 'emiya yasimasimana apwesa yaita 'ina loinega ga gete nadigega yaguiguinuwa'esa.”

## 12

*'Inapwana 'ina bagula 'ana topaisewao  
(Madiu 21:33-46; Luke 20:9-19)*

1 'Enega Yesu 'iona semalimaliyedi, 'igwae, “'Ebweu tai 'ina bagula 'iasona oine daisi-namo ga 'ali 'iguinuwena, ga oine 'ana 'ebebibi 'iguinuwena ga anuwa bagula solanaya 'i'abina, 'enega 'ina toguinuwao 'iloinedi be si'ita'i'isi, ta tauna 'itauya mali esenaya.

2 “Ta sesoi 'ana tutaya, 'inapwana nina 'ina 'ali'ei 'ebweuna 'ietunena be 'aene oine uwana bagula 'ana to'ita'i'itao 'ediyega 'ida me'edi.

3 'Itautauya ga nigeya si'ebwa'ebwa'e, ta esi sigiyaina ga sisapina 'enega ma'animenimenamo sietunena ga 'iila.

4 “'Enega 'inapwana nina 'ina 'ali'ei 'eluwena wate 'ietunena 'ediya, ga siununa debanaya ga ma ina omayamaya 'iila.

5 “Ta wate 'etonina 'ietunena 'ediya ga siloemwawasina. Ta yaudi wate 'ietunedi 'ediya ga 'aidi sisapidi ta 'aidi siloemwawasidi, ga 'enega maibo'adi sigie to'umaliyedi.

6 “Gote 'ena 'ebweuna namo 'imiyami, tauna natu'ai'ailina. 'Enega tauna wate 'ietunena 'ediya, 'igwae, “Tauna sana natugu, 'enega sida 'amayabe.’

7 “Ta ni'atu natuna 'iapwesa 'ediya ga to'ita'i'itao nidi taudimo 'ediya sigwae, 'Gosemao, 'Inapwana gete natuna 'imeemai, 'enega batuwa nina taloemwawasi be 'abo'ada bagula taloine.’

8 \*Ta sigiyaina ga siloemwawasina ga bagula 'etaulunaya siula apwesena.”

9 Ga ni'atu Yesu 'ina emwasala 'igumwala, ga 'ienaida 'ediya, 'igwae, “To'ase 'iabe 'inapwana nina 'iguinuwe? Ona'ai'aila 'inapwana nina 'imama be toguinuwa nidi 'iloemwawasidi, be 'enega bagula nina mali to'ita'i'itao 'i'ebwa'edi.”

10 \*'Enega Yesu wate onasemalimali Buki Tabu 'enega 'isimanena, 'igwae, “Wanuwa'i'isi Buki Tabu 'ina simana gete nadigega:

'Ola nina lowa to'abi anuwa siguitoyasena.

Ta gete tugai ni'atu sietoolona be 'ie'ola nuga,

be 'ola maibo'adi 'iloinedi.

11 Nate 'Inapwana 'ina guinuwa 'ebe nuwaowana 'edaya.’ ”

12 Yesu 'ina onasemalimali gete totaliyao sinabwadi be Palisiyao sinonona ga simwalatonina 'aene taudi tuga manudi 'ionaona, 'enega 'aina 'eda'eda si'ebesena be sida giyai, ta esi nigeya sigiyagiyai manuna simatauta pwalu 'ediya. 'Enega sipilisinena ga sitauya.

*Sisa 'ina takisi  
(Madiu 22:15-22; Luke 20:20-26)*

\* 12:8: Ib 13:12 \* 12:10: Sam 118:22-23; 1 Pi 2:6-8

13 Ta 'enega 'inapwanao nidi 'aina Palisiyao be wate Elodi 'ina bodao sietunedi Yesu 'enaya be enaidega sikaboe be 'ina loegesi siloba.

14 'Enega Yesu 'ena simai ga sieonena, sigwae, “'Inapwana, ni'atu 'amwalatonimu 'aene 'oyo toe'ita 'ai'aila, ta tomota 'idi waiwai manuna nigeya 'umatamatauta, ta tuga ona 'ai'aila 'usimana leleleya tomota maibo'adi 'ediya, nate Yaubada 'ina 'eda 'ue'ita 'ai'aila. 'Enega mwa'adega? Sawesawenaya be Kini Sisa manuna takisi tasa'u, nai nigeya?”

15 Takisi nina taemaisi Kini 'enaya, nai nigeya?”

Ta Yesu 'idi kabo ni'atu 'imwalatonina, 'enega 'ieonedi, 'igwae, “To'ase manuna watootoogu? Abaga mani nina wame'e be ya'ita.”

16 'Enega mani 'ebweuna si'ebwa'ena. Ga Yesu 'ieonedi, 'igwae, “Wada eonagu, mani gete 'ena yaita 'ana ma'ama'yau ta 'ana esana?”

Ta sigwae, “Kini Sisa.”

17 \*'Enega Yesu 'ieonedi, “O nadigega. 'Enega 'eguma Kini 'ina yage wa'ebwaya Kini 'enaya, ta 'eguma Yaubada 'ina yage Yaubada wa'ebwa'e.”

Ga Yesu 'ina ona gete manuna nuwadi 'iowana sinabwana.

*Tomwawasa 'idi toololimana  
(Madiu 22:23-33; Luke 20:27-40)*

18 \*'Enega wate Sadusiyao, taudi nigeya siemiemisa tomwawasa 'idi toololimana manuna, simai ga Yesu 'ena sienaida, sigwae,

19 \*“'Inapwana, lolina gete nadigega Mosesi 'i'etoladina manuda, 'igwae, ‘'Abo 'ebweu tai 'iai

---

\* 12:17: Lo 13:7      \* 12:18: Gu 23:8      \* 12:19: 2 Loi 25:5

be nigeya natunamo ta 'imwamwawasa, tai nina tasina kwabulinana ma'iyana sida ai, be 'enega 'abo waine 'ienatuna, natunao tokwaiya nina 'ana lopa'eluyao.' ”

<sup>20</sup> 'Enega 'ebel'ita si'ebwa'ena, sigwae, “'Ebweu tai matasinao simiyami 'adi yau site sebeni, ga 'adi tomatuwa nina 'iai ga nigeya natunamo ta tai nina 'imwawasa. 'Enega wate tasina selabenega kwabula nina 'iaina ga wate nadigega nigeya natunamo ta 'imwawasa.

<sup>21</sup> 'Enega tasina selabenega kwabula nina 'i'ewena ga wate simiyamiyana ta nigeya natunamo, ta tai nina 'imwawasa.

<sup>22</sup> Ta nadigega tuga tasinao maibo'adi kwabula nina siaiai ta simwamwawasa, ta nigeya wate natudimo. Ta muliyega waine wate 'imwawasa.

<sup>23</sup> 'Enega toololimana 'ana tutaya waine nina to tai batu mwane 'ai'ailina? Manuna site sebeni nidi ni'atu siaina.”

<sup>24</sup> Ta Yesu enaida gete 'ie'isena, 'igwae, “Gete 'imi loegesi, manuna Buki Tabu nigeya wamwalamwalatoni, ta wate Yaubada 'ina waiwai nigeya wamwalamwalatoni.

<sup>25</sup> Toololimana mulinaya tomota geya'abo siaiai, ta esi 'idi miya aneloseyao galewaya nadigega.

<sup>26</sup> \*“Lowaenei Yaubada Mosese 'ieonena toololimana manuna, 'abo Buki Tabu wasawai wada 'italoba. Manuna tuta nina Mosese mitawayaya 'itautauya ta Yaubada kaiwe sabelulu 'enega Mosese nina 'ieonena, 'igwae, 'Abo'agu Ebelaamo 'ina Yaubada ta Aisake 'ina Yaubada ta Yekobe 'ina Yaubada.’

---

\* **12:26:** Sia 3:2-6



27 Yaubada nige ya tomota mwawamwawasidi 'idi Yaubada, ta esi tomota mayawasidi 'idi Yaubada. Ta 'omi 'imi e'ita yage gete manuna nige ya palupaluna.”

*Loina sinabwadi*

*(Madiu 22:34-40; Luke 10:25-28)*

28 'Enega loina 'ana toe'ita 'ebweu 'imai ga taudi 'idi egewagewana Yesu ma'edi 'inonona ga 'idi enaidao 'adi e'isa Yesu 'enega 'inonodi bobo'ana wawasae, 'enega tauna wate Yesu 'ena 'ienaida, 'igwae, “'Inapwana, loinao maibo'adi 'ediyega to loina sinabwana?”

29 \*Ta 'enega Yesu 'igwae, “Loina sinabwana gete: 'Omi me Isileli 'igu ona gete wanonoi 'aene 'Inapwana Yaubada tebweuna namo,

30 'enega 'imu 'Inapwana Yaubada 'uda obobome 'ateyo be yaluyaluwayo be nuwayo be wate 'imu waiwai maibo'ana 'ediyega.

31 \*“Ta 'ebweu wate loina sinabwana gete: Gosemwao 'uda obobomedi, nadigega tauyo 'amu oboboma.

“Loina 'eluwa getedi loina maibo'adi sisinabwa sinedi.”

32 'Enega loina 'ana toe'ita nina Yesu 'ina ona 'inonona ga 'igwae, “'Inapwana, 'imu ona nate ona 'ai'aila 'aene tauna tebweuna tuga Yaubada, ta nige ya 'ebweu wate Yaubada 'imiyami.

33 \*'Enega 'ilobweneda be taobobome 'ateda maibo'anega be nuwada maibo'anega be 'ida waiwai maibo'anega, be wate gosedao tada

---

\* 12:29: 2 Loi 6:5      \* 12:31: 1 Loi 19:18; Lo 13:9-10; Ga 5:14

\* 12:33: Osi 6:6

obobomedi nadigega tauda taobobomeda. Loina 'eluwa getedi taliya yauyaudi be 'ebwayadaitao maibo'adi sisinabwa sinedi, aga?"

<sup>34</sup> Ta Yesu tai nina 'ina ona 'inonona 'aene palupaluna, ga 'ieonena, 'igwae, "Nate ona 'ai'aila, ta 'oyo Yaubada 'ina 'ebeloina 'ena ni'atu 'uloselabena."

'Enega muliyega tomota Yesu simatautena ga nigeaya 'ebweu yaita 'itootoo be 'ienaida limana 'enaya.

*To'etoseyana nina tauna Debida 'ina susu  
(Madiu 22:41-46; Luke 20:41-44)*

<sup>35</sup> Ta 'enega Yesu Anuwa Tabu solanaya 'ie'ie'ita tomota 'ediya, ga 'ieonedi, 'igwae, "Mwa'adega ga 'enega 'aina loina 'ana toe'itao sigwae 'aene Debida 'ina susuyega To'etoseyana Keliso 'iapwesa,

<sup>36</sup> \*manuna lowa Yaluyaluwa Tabuna Debida 'igiesinapuna ga Debida To'etoseyana nina 'i'awa 'inapwanena, 'igwae:

Yaubada 'iona 'igu 'Inapwana 'enaya, 'igwae,  
" 'Ataiguya 'umiyatowa be 'ana laba  
'amu talauwalao yasa'u mwa'utedi 'aeyo 'ubuninaya."

<sup>37</sup> Debida nina 'ina 'Inapwana Keliso, 'enega mwa'adega sana ga Debida 'ina susuyega muliyega Keliso 'iapwesama?"

Ta boda maibo'adi Yesu 'ina e'ita nuwadi 'i'ewena.

*Yesu loina 'ana toe'itao 'i'awa to'umaliyedi  
(Madiu 23:1-36; Luke 20:45-47)*

---

\* **12:36:** Sam 110:1; Gu 2:34-35

38 'Enega Yesu 'ieonedi, 'igwae, “Geya'abo loina 'ana toe'itao 'idi bubuna wamulimuliye. Manuna taudi adelidi tuga nadigega tuta yauna nuwanuwadi be 'adi 'oamao duduladi si'otedi be tomota gamwagamwanidiya sisakosakowasi be 'aene sida 'amayabedi.

39 Ta wate nuwanuwadi 'ebemiya bobo'adi Anuwa Tapwalolo 'ediya, be wate sagali 'adi tuta yauna nuwanuwadi be bwaimaya sida miyatowa.

40 Ta wate tuta yauna tomota matadiya Yaubada 'ena sisidasida dudulana, ta esi 'idi sida nina nige ya bobo'ana, manuna 'atediya sinuwanuwa mwa'adega 'iabe kwabulao sikabo'esedi be 'idi gwegweyao si'ewadi. 'Enega ma'etamo Yaubada e'isa to'umalina 'i'ebwa'edi.”

### *Kwabula 'ina 'ebwayadaita*

*(Luke 21:1-4)*

41 'Enega Yesu 'ebwayadaita 'ana 'ebesa'u deinaya 'imiyatowa, ga tomota yaudi 'idi 'ebwayadaita mani sisa'usa'u ta Yesu 'iyo'oyo'o, ga toesaesao 'idi 'ebwayadaita sinabwadi 'i'itedi,

42 ta wate kwabula gomagamabesona 'i'itena 'ina 'ebwayadaita toea 'eluwa namo 'isa'udi.

43 \*'Enega Yesu 'ina tononoyao 'ibwau egogonedima, ga 'ieonedi, 'igwae, “Ona'ai'aila, kwabula gote 'ina 'ebwayadaita maibo'adi 'idi 'ebwayadaita 'isinabwa sinedi.

44 Manuna maibo'adi 'idi tupwa sinabwana 'imiyami, ta esi kwabula gote gomagamabesona ta 'ina mani maibo'ana 'isa'una, ga nige ya

---

\* 12:43: 2 Ko 8:12

'ebweu wate 'ina tupwa 'imiyami be 'enega 'ana masula 'ida gimwane.”

## 13

*Tuta mwauna ma'etamo 'iapwesama  
(Madiu 24:1-14; Luke 21:5-19)*

<sup>1</sup> 'Enega Yesu ma ina tononoyao Anuwa Tabu 'enega siapwesa, ga 'ina tonono 'ebweu Anuwa Tabu 'ana anuwao Yesu 'ena 'ie'itaena, 'igwae, “'Inapwana 'u'ita anuwa getedi 'adi guinuwa bobo'ana wawasae, gulewa sinabwadi 'ediyega si'abidi.”

<sup>2</sup> \*Ta Yesu 'igwae, “Anuwa nidi sinabwadi 'u'ita'itadi ma'etamo maibo'adi siligeya yauledi be geya'abo wate 'ebweu tupwa wa'ita'ita lima.”

<sup>3</sup> Muliyega Yesu 'itauya Olibe 'oyana 'ena ga 'imiyatowaya ta 'enega Anuwa Tabu Yelusalema 'enaya 'idunedune, ga Pita, Yemesa, Yoni be Anidulu simai ga taudimo Yesu ma'edi, 'enega sieonena, sigwae,

<sup>4</sup> “'Inapwana, 'ueonama to tuta 'ena Anuwa Tabu nidi siligeidi ta to we'iwe'iyaya 'adi 'ita 'ediyega 'ada mwalatoni 'aene yage nidi 'uonaediya 'iabe siapwesama?”

<sup>5</sup> 'Enega Yesu 'ilolagata ga 'ediya 'igwae, “Wa'ita'i'isimi 'abona nai tomota 'aidi sikaboemi.

<sup>6</sup> \*Manuna ma'etamo tomota yaudi 'agu esanega simama be 'aene sianugana gesiyemi, be 'ebweuna 'ebweuna 'ida gwae, 'Abo'agu To'etoseyana nina,' be tomota yaudi sida muliyedi.

---

\* 13:2: Lu 19:44      \* 13:6: Mk 13:21-22; 1 Yo 2:18

<sup>7</sup> Wate ale 'etamo wanonodi saiyo selabemiya ta 'edasolaya manudi, ta geya'abo wa'ate'ate sa'ala, manuna yage getedi sida apwesa nugana ta esi bale'u 'ana 'ebe losalowa 'ana tuta ma'etamo.

<sup>8</sup> Manuna 'etamo mali boda mali boda 'ediya sida losaiya, ta wate mali 'ebeloina mali 'ebeloina 'ediya sida losaiya, be wate mwani'ini'i siapwesa sena yaudi 'ediya, be botana sinabwadi sida apwesa. Ta yage getedi tuta mwaudi 'ana 'ebe e'ale tuga.

<sup>9</sup> \*<sup>9</sup>“Ta 'omi esi walita'isimi, manuna tomota sida giyaimi be sitauyemi etala manuna, be Anuwa Tapwalolo 'ediya 'etamo sisapisapimi, ta wate 'iabe toloinao be kiniyao matadiya si'au'ewami be watoolo ta sietalaemi, manuna 'omi 'aene 'igu bodao, be teteligu 'ediya wada simane.

<sup>10</sup> \*<sup>10</sup>“Ta tetela bobo'ana 'ida 'elelewana nugana sena maibo'ana 'ediya be muliyega tuta 'ana 'ebe losalowa 'ida apwesa.

<sup>11</sup> “Ta 'abo toloinao matadiya sietoolomi sabi etala, geya'abo wa'ate'ate sa'ala be 'aene wada ona'esa, ta esi ma imi 'atepatu wada ona tuga, manuna nigeya 'omi 'imi ona wasimasimane, ta esiya Yaluyaluwa Tabuna tuta gote 'ena ona li'ebwa'emi be wasimana apwese.

<sup>12</sup> “Ta wate tuta simeemai 'ediya tomota 'idi susu solanaya losaiya 'ida apwesa manugu, nate tai tasina 'isipupuyei be siloemwawasi. Be nadigega wate tamana natuna 'ida sipupuyei be

---

\* **13:9:** Md 10:17-22      \* **13:10:** Md 28:19

siloemwawasi. Be wate gogama sinadiyao be tamadiyao sida etalauwaledi be siloemwawasidi.

13 \*Be tomota maibo'adi sida etalauwalemi manuna 'omi 'aene 'agu toemisao. Ta 'abo yaita 'ie'alama'i'ita be 'itoolopa'ala be 'ana laba tuta 'ana 'ebe losalowa 'enaya, gwausowala ataya 'ida loba.

*Mwau sinabwana  
(Madiu 24:15-28; Luke 21:20-24)*

14 \*"Ma'etamo 'eguma tomota wa'ita yage to'umali wawasae ta gadilulu sietoolo sena etaetabuna 'ena ('Abo yaita ona gete 'isawai 'ida nuwa sabwalena), tuta gote 'enaya Yudia 'ana tomiyanao 'ilobwenedi be 'oya 'ediya sidedena.

15 Ta 'eguma yaita bwaimaya 'imiyami 'ida dena manini ta geya'abo 'ilugulugu limana 'ina anuwaya 'ina gwegwe sabi 'ewadi.

16 Be 'abo yaita bagulaya 'ipaipaisewa geya'abo 'ilaila 'ana 'oama mali esenaya 'isa'unaya manuna.

17 "Ta tuta gote 'enaya to'euwanao be toesusuyao sienuwa'ole'ole.

18 'Enega wada sidasida be tuta bobo'ana Yaubada 'ida 'ebwa'emi 'imi tuta dena 'enaya, ta geya'abo gogai 'ana tutaya.

19 \*"Ona'ai'aila tuta gote mwau wawasae, manuna tuta nina Yaubada bale'u 'imweluluina 'enega ga batuwa nigeaya 'ebweu wate mwau gete nadigega, ta muliyega mwau gete geya'abo wate 'iapwesapwesa limana.

---

\* 13:13: Yo 15:18-21    \* 13:14: Dan 11:31    \* 13:19: Dan 12:1

20 Mwau gote 'ana 'asiyatao 'eguma Yaubada geya'abo 'igiegie kukupai 'iabe tomota maibo'adi simwamwawasa, ta esi Yaubada 'asiyata nidi 'ida giekukupu, nate tauna 'ina tomotai esiesinuwadi manudi.

21 “'Enega 'abo yaita 'ieonami be 'igwae, ‘Keliso gete’ nai ‘Gote’ geya'abo waeemisedi.

22 \*Manuna Keliso kabokabo be palopitao kabokabo 'iabe siapwesa be we'iwe'iyaya wai-waidi tomota 'ediya sida e'itaedi, be 'ediyega 'abo sawesawediya Yaubada 'ina bodao esiesinuwadi sikwakwani.

23 'Enega wa'ita'i'isimi manuna yage getedi manudi ni'atu yagimi simanedi 'emiya.

*Yesu 'ina ila limanama  
(Madiu 24:29-31; Luke 21:25-28)*

24 \*“Ta tuta mwau nina 'igugumwala be muliyega sinala 'iguguyoi be wate nawalae 'ina maedana 'ikwekweu,

25 be kwadimao galewega sibebe'u, be yage yauyaudi galewaya simiyami 'idi waiwai sida neneta.

26 \*'Abo'agu Tomota Natuna, be tuta gote me bale'u maibo'adi si'itagu pwanega yamwa'umwa'utama ma igu waiwai ta ma igu esaesa sinabwana,

27 \*be 'enega 'igu aneloseyao yaetunedi be 'igu boda esiesinuwadi siegogonedima bale'u be galewa be yagila maibo'adi 'idi senao 'ediyega.

---

\* 13:22: 2 Te 2:9; Et 13:13      \* 13:24: 2 Pi 3:10; Et 6:12-13

\* 13:26: Md 26:64      \* 13:27: 1 Te 4:16-17

*'Ebe'ita saido 'enega*  
(Madiu 24:32-35; Luke 21:29-33)

28 “'Ebe 'ita saido 'enega yada e'itami 'aene 'eguma saido\* yawadi auwaudi 'igalugalu wamwalatonina 'aene losiye 'ana tuta 'iloseloselabe.

29 Ta wate we'iweliyaya nidi ni'atu 'emiya yasimamedi, 'eguma to tuta wa'italobadi ni'atu wamwalamwalatoni 'aene 'igu tuta ila limanama ni'atu 'iloseloselabena.

30 Ona'ai'aila 'epata gete geya'abo wagumwagumwala be 'ana laba yage nidi maibo'adi sida apwesa.

31 “Ma'etamo galewa ta bale'u sisasawala ta 'igu onao geya'abo sa'i sisawasawala.

*'Ina mai 'ana tuta nigeya mwalatoninamo*  
(Madiu 24:36-44)

32 \* “Nigeya 'ebweu yaita 'imwalamwalatoni to tuta nai to 'asiyata 'ena yaila limanama, ta wate aneloseyao galewaya nigeya simwalamwalatoni. 'Abo'agu wate nigeya yamwalamwalatoni. Ta Tamagu tebweuna namo 'imwalamwalatoni.

33 \* “'Enega walomata'i'ita manuna 'igu tuta ila limanama nigeya wamwalamwalatoni.”

34 'Ebe'ita wate Yesu 'i'ebwa'edi, 'igwae, “'Eguma 'ebweu 'inapwana 'iabe 'ina anuwa 'ida pilisine be 'itatauya mali senaya, 'ina toguinuwao 'ebweuna 'ebweuna 'idi paisewa 'i'ebwa'edi, be 'iloinedi be 'aene 'ina anuwa si'ita'i'isi, ta wate

---

\* **13:28: saido:** 'Ebe'ita gete me Yudia 'idi kaiwe 'ana esana pigi (fig), uwana tupwana nadigega damaya uwana, ta esi yawadi sisagusagu nadigega saido. \* **13:32:** Gu 1:7 \* **13:33:** Md 25:13



anuwa 'ana 'awa 'ana to'ita'i'ita 'ieonena, 'igwae,  
'Geya'abo 'u'eno'eno ta esi 'ulomata'i'ita 'ai'aila.'

<sup>35</sup> \*'Enega 'ilobwenemi be walomata'i'ita  
be wayamwayamwagu, manuna toni anuwa  
'ina mai 'ana tuta nigeya wamwalamwalatoni,  
nai 'asuinuwanuwaya, nai niuniuwanaya, nai  
tomwa uliulitaya, nai gonagonaya.

<sup>36</sup> Ta geya'abo yalatuma be 'eno'enoega  
yaloeloesalutuimi.

<sup>37</sup> "Igu emataluwa gete 'omi 'emiya be wate  
tomota maibo'adi 'ediya 'aene wada lomata'i'ita  
'ai'aila."

## 14

*'Inapwanao nuwanuwadi be Yesu  
siloemwawasi*

*(Madiu 26:1-5; Luke 22:1-2; Yoni 11:45-53)*

<sup>1</sup> \*Ataona Sagalina 'ana 'ebe nuwa'i'ita 'ida ap-  
wesa 'asiyata 'eluwa mulidiya. Sagali nina 'enaya  
pwalawa daisina, nigeya 'ana 'ebe gieseseyamo,  
si'a'ani. Ta totaliyao sinabwadi be lolina 'ana  
toe'itao sinuwanuwa edaedadama mwa'adega  
Yesu sida kabo'ese be 'aene sida giyai be sida  
loemwawasi,

<sup>2</sup> ta sigwae, "Geya'abo sagali solanaya Yesu  
tagiyagiyai 'abona nai tomota sigamwasowaleda  
be silosaiya 'edaya."

*Waine Yesu 'ieoloina 'asa Betani 'enaya*  
*(Madiu 26:6-13; Yoni 12:1-8)*

---

\* 13:35: Lu 12:37-38      \* 14:1: Sia 12:1-27; Mk 10:33-34

<sup>3</sup> Tuta nina Yesu Betani 'ena 'imiyami, ta 'i'e'ai Saimoni 'ina anuwaya, tauna lowa tole-pelo 'ebweu; ga waine 'ebweu ma ina bunama 'iluguma; ta bunama nina 'ana esana nadi, 'ana maisa sinabwana, ta 'ana botolo bobo'ana wawasae 'enaya 'isiwena. Ta waine botolo 'awana 'i'aulasena ga bunama nina Yesu de-banaya 'isiwena.

<sup>4</sup> Ta 'aina tomota si'itena ga waine silo-mugiyena, sigwae, “To'ase manuna bunama 'imudalina?

<sup>5</sup> 'Ilobwenena be bunama nina 'igimwaneye be 'ana maisa 'etoi analedi kina nadigega 'i'ewa be 'ieguyaiye togomabeso 'ediya.” 'Enega waine nina si'ena pa'alina.

<sup>6</sup> Ta Yesu 'ieonedo, 'igwae, “Tuwa! Walosa'u! Geya'abo waine wagie dededoni, manuna 'ina lema gete 'eguya bobo'ana wawasae.

<sup>7</sup> Togomabeso nidi waoneonedo tuta maibo'ana selabemiya simiyami, be 'abo to tuta nuwanuwami wada lemedi, ta 'abo'agu esi nigeaya tuta dudulana ma'emi tamiyami.

<sup>8</sup> \*Ta waine gete to'ase sinabwana nadigega 'enaya 'iguinuwena 'eguya, nate bwalagu 'igimi eoloina sabi gibubu 'agu sa'u'ali'ali manuna.

<sup>9</sup> Ta ona'ai'aila, ma'etamo teteligu 'ana loguguya tomota sinoonoi bale'u maibo'ana 'enaya, ta waine gete 'ina guinuwa 'eguya tetelina sida emwasali wate.”

*Yudasa 'ina tagwala Yesu 'ana telesipupu manuna  
(Madiu 26:14-16; Luke 22:3-6)*

---

\* 14:8: Yo 19:40

10 'Enega Yesu 'ina tonono 'ebweu site tuwelo 'ediyege, tauna Yudasa Isikaliota, 'itauya totaliya sinabwadi 'ediya ga nuwanuwana be Yesu 'ediya 'ida telesipupuye.

11 Ga Yudasa 'ina ona sinonona ga sigwau-sowala ga 'ena siona upaupa be 'aene 'ana maisa si'ebwa'e. 'Enega Yudasa tuta bobo'ana 'iyamwena be 'aene Yesu 'ediya 'ida telesipupuye be sigiyai.

*Yesu ma ina tononoyao si'e'ai*

*(Madiu 26:17-25; Luke 22:7-14, 21-23; Yoni 13:21-30)*

12 \*Ataona Sagalina solanaya beledi daisina nigeaya gieseseinamo sie'ani ga sagali 'ana 'asiyata nugana 'ena lamiyao siunudi Ataona 'ana 'ebe nuwa'i'ita manuna, ga 'asiyata nina 'ena Yesu 'ina tononoyao sieonena, sigwae, “'Inapwana, mane 'ena nuwanuwayo be Ataona Sagalina manuyo 'agibubu?”

13 'Enega 'ina tononoyao 'eluwa 'ietunedi ta 'ieonedi, “Watatauya Yelusalema, be 'abo tai 'ebweuna ma ina 'ebe gobwasi 'i'aalina waloba, tai nina wamuli 'oayabu

14 be ma'emi walulugu anuwaya, be toni anuwa waeona, wagwae, 'Ima toe'ita gete nadi-gega 'iona'esa, “To sena 'utagwale be 'ena ma igu tononoyao Ataona masulina 'a'a'ani?” ’

15 Be 'enega 'iabe sena sinabwana etanaya gibugibubuna 'ie'itami, tauna 'ena Ataona masulina wagibubu manuda.”

---

\* 14:12: Sia 12:14-20

16 'Enega tonono nidi sitauya ga 'asa Yelusalema 'ena silugu ga to'ase nadigegega Yesu 'isimanena 'ediya yage nidi maibo'adi silobedi, ga anuwa nina 'ena Ataona masulina sigibubuna manudi.

17 Ta 'asuinuwanuwaya Yesu ma ina tononoyao simai

18 \*ga site tuwelo simiyatowa sabi 'e'ai. Ta 'idi 'e'ai solanaya Yesu 'ieoned, “Gosegwao yaona 'ai'aila 'aene 'ebweuna tai gete tuga ma'edai ta'e'ai, ta sa'i 'iabe 'itelesipupuyegu.”

19 Ta Yesu 'ina ona gete manuna sinuwa mwau, ga 'ebweuna 'ebweuna Yesu 'ena 'ienaida, 'igwae, “'Inapwana, yaita? Nai 'abo'agu?”

20 Ga Yesu 'igwae, “'Agu tosipupu nina 'omi wate tuwelo 'emiyega, ta tauna ma'iyagu gaeba 'ebweuna 'enega 'a'e'ai.

21 'Abo'agu Tomota Natuna ma'etamo yatatauya 'eda nina lowa Buki Tabu 'ena 'igimisimanena, ta esi 'agu totelesipupu nina nuwa'ole'olena sa'i; ta bobo'ana 'abo lowa sinana geya'abo 'ida enaenatune, manuna 'ina tubuwa 'enega 'ienuwa'ole'ole 'ina guinuwa to'umalina manuna.”

*'Inapwana 'ina 'e'ai*

*(Madiu 26:26-30; Luke 22:15-20; 1 Kolinita 11:23-25)*

22 'Etamo sile'ai ta Yesu masula 'i'ewena ga manuna 'iona oboboma ta 'igitomwena ga 'i'ebwa'edi, 'igwae, “Gete wa'ewa oogu.”

---

\* **14:18:** Sam 41:9

23 Ta oine makeigana wate 'i'ewena ga manuna 'ilokagutoki Yaubada 'ena ga 'i'ebwa'edi, ga maibo'adi sinuma.

24 \*Ta wate 'ieonedi, 'igwae, “Gete lalagu 'idaudau tomota yaumi manumi, nate lolina auwauna.

25 Ta yaeonemi tuta gete be mulinaya oine gete geya'abo 'enega yanumanuma limana ga 'ana laba oine auwauna yanunuma Yaubada 'ina senaya.”

26 'Enega wali 'ebweuna siwaliyena ta siapwesa ga situ'e 'Oya Olibe 'enaya.

*Yesu 'isimana apwesa eyaseyase manuna  
(Madiu 26:31-35; Luke 22:31-34; Yoni 13:36-38)*

27 \*Ta Yesu 'ieonedi, “'Iabe maibo'ami wada denasinegu, nadigega Buki Tabu 'ina simana, 'igwae,

‘To'ita'i'ita sipi yaloemwawasi be sipi nidi sida 'elelewana.’

28 \*Ta 'igu toololimana mulinaya Galili 'ena yatatauya be 'omi muliguyega wawawai.”

29 'Enega Pita 'ilolagata ga 'igwae, “'Iabe maibo'adi sidena sineyo ta tebweugu ma'iyayo.”

30 \*Ta Yesu Pita 'ieonena, “Yaona 'ai'aila, boi-boi batuwa muliyega be kakaleko 'igwagwane maluwa, ta 'oyo 'uda gimi eyaseyaseyegu matoi.”

31 Ta 'enega Pita ma ina 'awapa'ala 'igwae, “'Inapwana, geya'abo sa'i yaeyaseyaseyeyo. 'Eguma siloemwawasiyo 'abo'agu wate ma'iyayo

---

\* **14:24:** Sia 24:8; 1 Ko 10:16; Yo 6:54-56      \* **14:27:** Yo 16:32; Sak 13:7  
\* **14:28:** Mk 16:7      \* **14:30:** Mk 14:66-72

siloemwawasida.” Tononoyao maibo'adi wate nadigega siona'esa.

*Yesu Gedesemane 'ena 'isidasida  
(Madiu 26:36-46; Luke 22:39-46)*

<sup>32</sup> Ga sitauya 'ebweu sena 'ana esana Gedesemane 'ena, ga 'ina tononoyao 'ediya 'igwae, “Gete 'ena wamiyami, ta 'abo'agu yasisida Yaubada 'ena.”

<sup>33</sup> Ta site toi ma'ena 'i'au'ewedi, taudi Pita be Yemesa be Yoni, 'enega Yesu ma ina 'ateuyauya ta ma ina nuwamwau,

<sup>34</sup> \*\*'ieonedi, 'igwae, “'Ategu 'iuyauya sinabwana nai 'iabe yamwamwawasa, 'enega bada wamiyami ta walomata'i'ita.”

<sup>35</sup> Ta Yesu 'ialaga tupwana ga 'ibe'u sanamwa'uta ga 'isidasida 'aene 'abo kapekapeyana 'elouya gete Yaubada 'ida 'ewayaule,

<sup>36</sup> \*'igwaegwae, “Tamagu ye, guinuwa yauna sawesawemuya, 'enega nuwanuwagu be 'elouya keigana gete 'eguyega 'u'ewayaule, ta geya'abo 'abo'agu 'igu nuwena 'enega ta 'oyo esi 'imu nuwena 'enega 'uda guinuwa.”

<sup>37</sup> 'Enega 'iila ga site toi nidi 'ilobedi ni'atu si'eno mwataya, ga Pita 'iloanoanona, 'igwae, “Saimoni, mwa'adega 'u'eno'eno. Nigeya sawesawemuya be tuta gidalina namo manuna 'umata pa'ala, aga?”

<sup>38</sup> Ga wate 'ieonedi maibo'adi, 'igwae, “'Ilobwenemi be wamata pa'ala be wasidasida be 'enega geya'abo Seitani 'itootoomi. Ona'ai'aila,

---

\* 14:34: Yo 12:27    \* 14:34: Ib 5:7-8    \* 14:36: Yo 6:38

yaluyaluwami nuwanuwana ta tuga manuna oomi sitaba.”

<sup>39</sup> 'Enega Yesu 'ilaga limana ta 'ina sidasida ni'a 'ilolimena.

<sup>40</sup> Ta Yesu wate 'iila 'ina tononoyao 'ediya ga 'ilobedi wate si'eno mwataya, manuna matadi ni'atu si'eno'eno. Ta 'iloanoanodi ga sitoolo ma idi omayamaya, ga nigeya 'idi 'ebe onamo.

<sup>41</sup> Ga Yesu wate 'ilaga ga 'isidasida, ta 'ina ilama 'etonina 'enaya 'ilobedi si'eno mwataya, ga 'ieonedi, “Mwa'adega, ma'etamo tuga wa'eno'eno ta waeyawai'ata, aga? Ta wa'ita, 'abo'agu Tomota Natuna 'igu tuta ni'atu 'iapwesa be sida sipupuyegu toto'umalidi 'ediya.

<sup>42</sup> Watoolo be tatatauya, manuna 'agu totele-sipupu nina ni'atu gete 'imeema.”

*Yesu 'ana giyaina*

*(Madiu 26:47-56; Luke 22:47-53; Yoni 18:2-12)*

<sup>43</sup> Yesu 'etamo 'ionaona ga Yudasa 'iapwesama, tauna Yesu 'ina tononoyao site tuwelo 'ebweuna 'ediyege. Ta wate totaliya sinabwadi be lolina 'ana toe'itao be 'inapwanao tolosaiyao Yudasa ma'edi sietunedi be 'aene Yesu sida giyai, ta boda nidi ma idi sisaiyao be wepasiyao wate sime'edi.

<sup>44</sup> Ta Yudasa we'iwe'iyaya ni'atu 'ediya 'isimanena, 'igwae, “'Abo yaita ya'atubwaili, nate tauna Yesu, be wagiya ta walomata'i'isi be watauye.”

<sup>45</sup> 'Enega 'itauya palupaluna Yesu 'ena ga 'ilokagutokiyena ta 'i'atubwailina.

<sup>46</sup> 'Enega boda nidi siapwesama ga Yesu sigiyaina.

47 Ta Yesu 'ina bodao 'ebweuna 'ediyege 'itootoolo selabenaya ga 'ina sisisaiya 'ilisololona ga totaliya sinabwana 'ina toguinuwa tenana 'i'upwa yaulena.

48 \*Ta Yesu boda 'ieonedi, 'igwae, “Sana 'abo'agu to'ipwala ga 'enega ma imi sisisaiya be ma imi wepasi wamai sabi giyaigu.

49 Ta to'ase 'alena ga 'enega nigeaya wagiyaigiyaigu 'asiyata nidi yaudi gamwagamwanimiya yamiyami Anuwa Tabu 'ena ta yae'ie'ita tomota 'ediya? Ta tuwa tuga yage getedi siapwesama be 'aene palopitao 'idi gimisimana Buki Tabu solanaya sida apwesa.”

50 \*'Enega Yesu 'ina tononoyao maibo'adi sidena sinena.

51 Ta 'ebweu tubuwau ma 'ana 'oama 'ebweuna namo Yesu 'i'oayabuna, ta tolosaiyao nuwanuwadi sigiyai,

52 ta sigisa'ilina ga 'ana 'oamamo si'ewena, ta mabubugewana 'idena.

*Yesu si'au'ewena toloinao 'ediya*

*(Madiu 26:57-68; Luke 22:54-55, 63-71; Yoni 18:13-14, 19-24)*

53 Ta Yesu si'au'ewena ga siluguyena totaliyao 'idi 'inapwana 'ina anuwaya, manuna anuwa nina 'ena totaliya sinabwadi be 'inapwano be lolina 'ana toe'itao ni'atu siegogonama ga simiyami.

54 Ta Pita 'edasolega Yesu 'imuliyena ga 'imai totaliya sinabwana nina 'ina 'asaya, ga Pita nina

---

\* 14:48: Yo 18:20 \* 14:50: Md 26:31; Yo 16:32



to'ita'i'itao ma'ediya simiyatowa, ta kaiwe 'ena sisiyasiyata.

<sup>55</sup> 'Enega totaliya sinabwadi be 'inapwanao nidi nuwanuwadi Yesu 'ana toe'ewao sida lobadi be 'idi e'ewa 'enega Yesu sida loemwawasi, ta nigeya 'ebweu wate silobaloba.

<sup>56</sup> Manuna toe'ewa yaudi sisimasimana, ta esi 'idi simana nigeya leleleya. Taudi maibo'adi tokabo tuga.

<sup>57</sup> \*Ta 'aidi 'ediyega sitoolo ga Yesu sie'ewa kabokaboena, sigwae,

<sup>58</sup> “Yesu 'ina ona 'ebweu 'anononaya, 'igwae, ‘Anuwa Tabu gete tomota si'abinaya ma'etamo yalige yaulei be 'asiyata 'etoi 'ediya yada 'abilima, ta nigeya tomota nimadiyega.’”

<sup>59</sup> Ta sa'i 'idi simanao yage gete manuna nigeya sieleleleya.

<sup>60</sup> 'Enega totaliya sinabwana nina matadiya 'itoolo ga Yesu 'ienaidena, 'igwae, “Nigeya 'imu e'isamo, aga? Tomota gotedi 'idi e'ewa 'emuya ni'atu 'unononaya?”

<sup>61</sup> \*Ta Yesu tuga 'i'alaenono, ga nigeya 'ionaona.

Ta 'enega totaliya sinabwana Yesu 'ena 'ienaida limana, 'igwae, “Mwa'adega 'oyo Yaubada natuna To'etoseyana niyo, nai nigeya?”

<sup>62</sup> \*Ga Yesu 'igwae, “'Abo'agu tauna, Tomota Natuna nigu, be ma'etamo wa'itagu Toewai-wai sana 'atainaya yamiyami be wate galewa pwananao debadiyega yamama.”

---

\* **14:57:** Yo 2:19-21    \* **14:61:** Mk 15:5; Ais 53:7    \* **14:62:** Mk 13:26; Dan 7:13

63-64 \*'Enega totaliya sinabwana nina 'igamwasowala 'ai'aila, 'enega taunamo 'ana 'oama 'isabuna ta 'igwae, "'Ina ona to'umalina wanononaya? Ona'ai'aila tai gete Yaubada 'isinalina. Tuwa! Geya'abo wate 'ana toe'ewao sionaona 'ina loegesiyao manudi. Mwa'adega 'imi nuwanuwa Yesu manuna?"

Ta 'enega maibo'adi silolagata ga sigwae, "'Ilobwenena be 'imwamwawasa!"

65 \*Gote 'ena 'aina tomota Yesu sigiwalina, ga matana 'oamega siwaduna ta siunu dadanena ma idi 'eetete, sigwae, "'Ueonama yaita 'isapimu."

Ta to'lita'l'itao nidi Yesu sigiyaina ga sisapisapi ta sitautauye.

66 Ta Pita ma'etamo 'etauluya 'imiyami, ga totaliya sinabwana 'ina toguinuwa gomagweine 'ebweuna 'iapwesama,

67 ga Pita 'i'itena 'isiyasiyata. 'Enega waine nina Pita 'iduneduneye ga 'igwae, "'Oyo goma Nasaleta Yesu nina lowa ma'iyayo wamiyami, aga?"

68 Ta Pita 'ieyaseyase, 'igwae, "Yage nina 'uonaonae nigeya yamwalamwalatoni." 'Enega Pita 'idena ga tupwana 'iaapwesa.

69 Ta gomagweine nina Pita 'ienima susuyena tomiya nidi 'ediya, 'igwae, "Tai gote Yesu 'ina boda 'ebweu."

70 Ga Pita 'inonona ga 'ieyaseyase limana, 'igwae, "'Abo'agu nigeya."

---

\* 14:63-64: Yo 19:7; 1 Loi 24:16      \* 14:65: Ais 53:5

Tuta kukupana namo mulinaya toyo'o nidi Pita sieonena, sigwae, “Ona'ai'aila 'ukabo. 'Oyo Yesu 'ina boda 'ebweu, manuna 'oyo goma Galili.”

<sup>71</sup> 'Enega Pita 'isawatamatamana ta ona to'umalina 'enega 'ibwautu'e, 'igwae, “Yesu tauna manuna waonaona, 'abo'agu nigeaya wate yamwalamwalatoni. Tamada!”

<sup>72</sup> \*Ta tuta gote 'ena kakaleko 'igwane 'eluwena, ga Pita 'inuwa'i'isina Yesu 'ina ona 'aene “Muliyega be kakaleko 'igwagwane maluwa, ta 'oyo 'uda gimi eyaseyaseyegu matoi.” Ta 'enega Pita 'ina kabo to'umalina 'inuwa'i'isina ga 'idedoi.

## 15

*Yesu 'ina etala Pailato matanaya*

*(Madiu 27:1-2, 11-14; Luke 23:1-5; Yoni 18:28-38)*

<sup>1</sup> 'Enega tomwa 'iulisina ga totaliyao sinabwadi be 'inapwanao be lolina 'adi toe'itao be toloinao maibo'adi sideli egogonama ga siloiloina Yesu manuna, 'enega nimana siyonidi ga sitauyena Pailato 'ena be 'aene Pailato nina 'ida loine.

<sup>2</sup> 'Enega Pailato Yesu 'ienaidena, 'igwae, “'Uda simana, 'oyo me Yudia 'idi kini, aga?”

Ta Yesu 'igwae, “Ni'atu nate 'uona saba.”

<sup>3</sup> Ta 'enega totaliyao sinabwadi yage yaudi manudi Yesu sie'ewena.

<sup>4</sup> 'Enega Pailato Yesu 'ienaida limena, 'igwae, “Mwa'adega nigeaya 'imu e'isamo? Simana getedi 'amu e'ewa manuna 'unononaya?”

---

\* 14:72: Mk 14:30

5 \*Ta Yesu nigeya 'ebweu wate 'ie'ie'isa, 'enega Pailato nuwana 'iowana sinabwana.

*Siloina be Yesu 'ida mwawasa  
(Madiu 27:15-26; Luke 23:13-25; Yoni 18:38-19:16)*

6 Yakwala 'ebweuna 'ebweuna Ataona Sagalina 'ana tuta 'enaya toloina nina 'ina bubuna nate deliyega 'ebweu tai 'ili'ami be 'iapwesa, 'eguma yaita pwalu siesinuwe.

7 Tuta gote 'ena 'aina me Loma 'adi talauwalao deliya simiyami, manuna geya nuwadi me Loma 'idi loina ga silosaiyedi, ga 'ebweuna 'ediyega 'ana esana Balaba, losaiya nina solanaya to-mota 'iloemwawasidi. 'Enega me Loma Balaba magosenao sigiyaidi ga deliya sisa'udi.

8 'Enega boda siegogonama ga si'awanoi Pailato 'enaya, sigwae, “Sawesawenaya be 'ebweu tai 'uda li'ami manuma, nadigega 'ima sidasida 'emuya 'uguiguinuwe yakwala 'ebweuna 'ebweuna 'enaya?”

9 'Enega Pailato 'ieonedi, “Nuwanuwami 'aene me Yudia 'imi kini yada 'etoli'ami manumi, aga?”

10 \*Manuna Pailato 'imwalatonina 'aene totaliya sinabwadi 'idi e'ipi'ipiyega Yesu siwasegiyena sabi loemwawasina.

11 \*Ta sa'i totaliya sinabwadi ni'atu tomota nuwanuwa to'umalina sienuwa sa'uyena 'ediya, 'enega Yesu siguitoyasena ta Balaba esiya 'ana esana si'inanena be 'ida li'ami manudi.

---

\* 15:5: Mk 14:61; Ais 53:7 \* 15:10: Yo 11:47-48, 12:19 \* 15:11: Gu 3:14

12 Ta Pailato 'ieonedi wate 'igwae, “Ta mwa'adega yada lina'esa tauna waeesena 'imi kini?”

13 Ga wate sibwau, sigwae, “Kelose 'ena tada tutuepa'iyē!”

14 Ta Pailato 'igwae, “To'ase sana 'ina loegesi ga 'enega 'aene mwawasa 'iloba?”

Ta sibwau toitoila, sigwae, “Kelose 'ena tada tutuepa'iyē.”

15 'Enega Pailato nuwanuwana be pwalu 'ida giegwausowalidi ga Balaba 'ili'amina, ta wate 'ina tolosaiyao 'iloinedi be Yesu balaeyega sida sapi be muliyega sida tutuepa'iyē kelose 'enaya.

*Tolosaiyao Yesu situyeyena*

*(Madiu 27:27-31; Yoni 19:2-3)*

16 'Enega Pailato 'ina tolosaiyao Yesu sisapina ta si'au'ewena ga 'ina anuwaya siluguyena, nate tolosaiyao 'idi sena sinabwana anuwa solanaya, ga tolosaiyao 'idi bodao maibo'adi sibwau egogonedima.

17 \*'Enega toesaesao 'adi 'oama bweyabweyalina 'enega Yesu sie'oamena ga 'ana peyaula kwakwakwala 'ediyege siguinuwena ga debanaya sisa'una.

18 Ga silolagata be tuyeya 'enega silokagutokiye, sigwaegwae, “Kamatoki 'oyo me Yudia 'idi kini ye!”

19 \*Ta wate 'etoguna 'enega Yesu debana sisapina, ta sigiwalina, ga tuyeyega matanaya si'aetulasa.

---

\* 15:17: Lu 23:11      \* 15:19: Ais 50:6

20 'Enega 'idi tuyeya 'igumwala, ga 'oama esaesa 'enega sialolona, ta tauna 'ana 'oamega sie'ote limena, ga si'au'ewena sabi giekelosena.

*Yesu situtu epa'iyena kelose 'enaya*

*(Madiu 27:32-44; Luke 23:26-43; Yoni 19:17-27)*

21 Ga 'asa sinabwana 'enega siapwesa, ga goma Sailini mitawega 'imeemai silobena, ga sididigena be Yesu 'ana kelose 'ida 'aali. Tai nina 'ana esana Saimoni, ta Alekisana be Lupuso tamadiya.

22 'Enega si'au'ewena sena Goligota 'enaya (Goligota 'ana mwalatoi nate 'Bulubulu 'asana'),

23 ga oine be mulo si'einisena ga si'ebwa'ena be 'aene geya'abo uya 'ilotolotoo sinabwana, ta Yesu 'iguitoyasena.

24 \*'Enega kelose bale'uya sisa'unaya ta Yesu 'enaya situtu epa'iyena ga sietoolona. Ga muliyega toguinuwa nidi Yesu 'ana 'oamao si'ewedi ga sieguyaiyedi taudimo 'ediya, ta 'idi eguyai esasala ulaesinuwa 'enega, be 'eguma yaita 'inugana 'ana 'oama 'ebweu 'i'ewa.

25 Tuta nina Yesu sigie kelosena nate gonagona 'ana gamwagamwana 'enaya.

26 Ta 'ana kelose 'enaya si'etoladina “Me Yudia 'adi toloina.” Nate 'ina mwawasa 'alena.

27 Ta wate to'ipwala 'eluwa sigie kelosed, 'ebweu Yesu 'atainaya ta 'ebweu gegeuminaya.

28 \*(-)

29 \*Ta tomota 'aina 'edega Yesu kelose 'ena situyeyena ta siedagiyena, sigwae, “Nuwa'ole'oleyo! 'Uona 'aene sawesawemuya

---

\* 15:24: Sam 22:18    \* 15:28: Ais 53:12    \* 15:29: Sam 22:7; Yo 2:19

Anuwa Tabu 'uligei be 'asiyata 'etoi soladiya 'u'abilima.

<sup>30</sup> Baga 'uda 'etoseyeyo tauyo be keloseyega 'uebusima.”

<sup>31</sup> Ta wate totaliyao sinabwadi be loina 'ana toe'itao taudimo 'ediya sionaona gagasa, ga Yesu si'eetetena, sigwaegwae, “Mali tomota li'etoseyedi ta tauna 'ida 'etoseye!”

<sup>32</sup> Tauna 'aene To'etoseyana nina ta sena Isileli 'ana toloina, abaga keloseyega 'ida ebusima be ta'ita, be 'enega taemise.”

Ta to'ipwala nidi Yesu ma'ena sigie kelosediya taudi 'adi keloseyega sibwa'onao ga Yesu siba'ena.

*Yesu 'imwawasa*

*(Madiu 27:45-56; Luke 23:44-49; Yoni 19:28-30)*

<sup>33</sup> Ta ni'atu 'asuoleole sena maibo'ana liguguyoi ga 'ana laba 'asuinuwanuwaya,

<sup>34</sup> \*ga 'asuinuwanuwaya Yesu 'enana sinabwanega 'ibwau, ga 'igwae, “Eloi, eloi, lama sabakitani,” ta 'ana gibui 'aene “'Igu Yaubada, 'igu Yaubada, to'ase manuna 'upilisinegu?”

<sup>35</sup> Ta 'aina tomota selabenaya sitootoolo 'ina bwau sinonona ta sigwae, “Wanono, Ilaitiya 'ibwaubwaue.”

<sup>36</sup> \*'Enega 'ebweuna 'ediyega 'ipili ga balou 'i'ewena, ga oine dalelena 'ena 'ietupa'utuina, 'enega 'ebweu kaiwe 'ena matana 'ibadiyena ga 'ie'etotu'eyena Yesu 'awanaya be 'isokuku, ta tai nina 'igwae, “Tuga tayamwayamwa, nai 'iabe Ilaitiya 'imama be keloseyega 'i'etoseye.”

---

\* **15:34:** Sam 22:1      \* **15:36:** Sam 69:21

37 Ta Yesu 'ibwau toitoila ga yawasina 'igumwala.

38 \*Ta kaleko nina Anuwa Tabu 'ana pitaupa 'iesabu luwena etanega ga 'imwa'uta 'ubunaya.

39 Ta tolosaiyao 'adi toanugana Yesu 'ana kelose matanaya 'itootoolo Yesu 'ina mwawasa 'ana 'ita gete nadigega 'i'itena, 'enega 'igwae, “Ona'ai'aila tai gote Yaubada natuna.”

40 \*'Aina iine wate 'edasolega sidunedune, nate Meli Magidala be 'ina waliyesa, tauna Yosese be tasina megwamana Yemesa sinadiya, be Salome wate,

41 taudi lowa Yesu simuliyena ta 'ana masula siguinuwenaya 'ina sakowasi Galili solanaya manuna, ta 'aina iine wate Galiliyega Yesu ma'enaosilagama Yelusalema 'enaya, maibo'adi siduneduneye.

*Yesu sisa'u 'ali'aliyena*

*(Madiu 27:57-61; Luke 23:50-56; Yoni 19:38-42)*

42 Ta ni'atu 'asuinuwa ga gibubuna mali 'asiyata manuna, nate me Yudia 'idi Sabate.

43 'Enega goma Alimatia 'ana esana Yosepa 'imai, tauna 'ebweu me Yudia 'idi toanugana ma 'ana emisa, ta 'iyamwayamwa be to tuta Yaubada bale'uya 'ida etoloina. Tauna Yosepa nina 'imai ga ma ina 'atepatu 'ilugu Pailato matanaya ga Yesu kokowana 'isidena be 'aene 'ida sa'u'ali'aliye.

44 Ta 'enega Pailato 'ilosuyaena, 'igwae, “Iyae! Yesu ni'atu 'imwawasaya?” 'Enega tolosaiyao

---

\* 15:38: Sia 26:31-33; Ib 10:19-20      \* 15:40: Lu 8:2-3



'adi toanugana 'ibwauyename, ga 'imai, ga Pailato 'ienaida, 'igwae, “Mwa'adega, Yesu ni'atu 'imwawasa?”

<sup>45</sup> Ga tai nina 'igwae, “O, ni'atu 'imwawasa.” 'Enega Pailato 'itagwala be Yosepa Yesu kokowana 'ida 'ewa.

<sup>46</sup> Ga Yosepa kaleko wakewakekena 'igimwanena ga 'i'ewenama, ga ma ina toguinuwao Yesu kokowana kelose 'enega si'ewa mwa'utenama, ga kaleko nina 'enega siwaduna, ga muliyega sisa'u 'ali'aliyena. Ta 'ali'ali nina sitainaya 'atuwa duluwa gulewa solanaya, ta gulewa sinabwana ta pulipulina 'enega 'ali'ali 'awana sisa'u bodena.

<sup>47</sup> Ta Meli Magidala be 'ina waliyesa, tauna Yosese sinana, ma'iyana sie'asiyedi ga 'ali'ali nina 'ena kokowana sisa'una si'itena.

## 16

### *Yesu 'ina toololimana*

*(Madiu 28:1-8; Luke 24:1-12; Yoni 20:1-10)*

<sup>1</sup> 'Enega Sabate nina 'igumwala ga Meli Magidala ma ina waliyesa, tauna Yemesa sinana, be Salome wate ma'ediya bunama bobo'ana sigimwanena be 'aene Yesu bwalana sida eoloi.

<sup>2</sup> Ga tomwa 'iulisina, nate wiki 'ana 'asiyata nugana 'enaya, ga sinala 'ina sae'unu 'enaya iine nidi ma idi bunama simai Yesu 'ana 'ali'ali 'ena.

<sup>3</sup> Ga taudimo 'ediya sionaona sigwae, “Yaita gulewa nina 'ali'ali 'awanega 'ida puliile manuda?” Manuna gulewa nina sinabwa wawasae.

<sup>4</sup> Ta 'enega si'itanao ga 'ali'ali 'ana 'auboda gulewa ni'atu 'awanega sipuli ilena si'itena.

5 'Enega iine nidi 'ali'ali solanaya silugu ga 'ataidiyega tubuwau ma 'ana 'oama wake-wakekena 'imiyami si'itena, 'enega si'atesa'ala.

6 Ta tubuwau nina 'ieonedi, 'igwae, “Geya'abo wa'ate'ate sa'ala. Yesu goma Nasaleta tauna sigiekelosena wa'ebe'ebese. Tauna nigeya bada, manuna ni'atu mwawasega 'itoolo limana. 'Ina 'ebe'eno gete wa'itena tuga kakaena.

7 \*Ta 'omi waila be Yesu 'ina tononoyao 'ediya wasisimana, ta wate Pita 'ena wasisimana, wag-wae, ‘Yesu 'itatauya nugana Galili 'ena, ta 'omi wamuliye be gote 'ena wa'ita, nadigega lowa 'ina simana 'emiya.’ ”

8 'Enega iine nidi 'ali'aliyega siapwesa manini ga siden, manuna nuwadi 'iowana, ta wate sidededela, ta 'idi matauta nigeya yaita 'ena sisimasimane.

*Yesu 'ina apwesa Meli Magidala 'ena  
(Madiu 28:9-10; Yoni 20:11-18)*

9 \*Wiki 'ana 'asiyata nugana gonagonaya, Yesu 'ina toololimana 'enaya 'igimi apwesa Meli Magidala 'enaya, tauna solanega lowa yaluyaluwa bi'i site sebeni Yesu 'iula apwesedi.

10 'Enega Meli nina 'itauya ga Yesu 'ina tomo-taiyao 'iemataluwedi, ta taudi tuga 'etamo ma idi nuwamwau sidedoi Yesu manuna.

11 Ta Meli emataluwa 'i'ebwa'edi 'igwae, “Yesu mayawasina 'imiyami. Ni'atu ya'itena.” Ta taudi sa'i si'awa kabokaboena.

---

\* 16:7: Mk 14:28      \* 16:9: Lu 8:2

*Yesu 'ina ellobaloba 'ina tononoyao 'eluwa 'ediya*

*(Luke 24:13-35)*

<sup>12</sup> Ta muliyega Yesu 'ana tomuliyao 'eluwa Yelusalemega siapwesa ga mali 'asa manuna sitautauya, ga Yesu 'igie apwesena tauna mali 'ita 'enega.

<sup>13</sup> 'Enega site luwa nidi Yelusalema 'ena si-ila ga gosediya siemataluwedi, ta sa'i nige ya siemiemisedi.

*Yesu ina tononoyao 'idi guinuwa 'i'ebwa'edi*

*(Madiu 28:16-20; Luke 24:36-49; Yoni 20:19-23; Guinuwa 1:6-8)*

<sup>14</sup> Muliyega Yesu 'ina tononoyao site elebeni si'e'ai ga Yesu matadiya 'iapwesa, ga 'i'enapa'alidi 'idi debapa'ala manuna, 'igwae, “Gosegwao taudi 'igu toololimana mulinaya si'itegu ga 'emiya sisimanaya, ta mwa'adega ga nige ya waeemisedi?”

<sup>15</sup> Ta emataluwa 'i'ebwa'edi, 'igwae, “Watatauya sena maibo'ana 'ediya be teteligu tomota maibo'adi 'ediya waguguyae.

<sup>16</sup> \*'Enega yaisigedi siemisegu wada giebapi-taiseodi, be 'etoseyana sida loba, ta 'abo yaisigedi nige ya siemiemisa ma'etamo lolina to'umalina siloba.

<sup>17</sup> \*“Ta 'agu toemisao nidi we'iwe'iyaya waiwaidi sida guinuwedi, nate 'agu esanega yaluyaluwa bi'i tomota 'ediyega sida ula apwesedi, be 'enana dumadumadi be dumadumadi 'ediyega sida onaona,

---

\* **16:16:** Gu 2:38, 16:31-33      \* **16:17:** Gu 2:4, 8:7, 28:3-6; Lu 10:19

18 be 'abo mwata bolabolausidi sigilagasidi geya'abo 'idi go'i 'enega siesiesilae, be 'abo bwasi bolausa sinunuma geya'abo simwawamwawasa, be wate 'abo tole'oasao sigitoodi sida bobo'ana tuga.”

*Yesu 'itu'e galewaya*

*(Luke 24:50-53; Guinuwa 1:9-11)*

19 \*'Ida 'Inapwana Yesu 'ina emataluwa 'ediya ni'atu 'ilosalonina ga 'itu'e galewaya, ga Yaubada 'atainaya 'imiyatowa.

20 \*Ta 'enega sitauya sena yauyaudi 'ediya ga Yesu tetelina siloguguyaena, ta sa'i 'Inapwana ma'edi siguiguinuwa ga 'ina waiwaiyega guinuwa 'ebe nuwaowanao siguinuwedi, ga 'enega tomota tetela nina siemisena.

---

\* 16:19: Gu 2:33-34; Ep 1:20

\* 16:20: Gu 14:3; Ib 2:3-4

**Loina Tabu Auwauna**  
**The New Testament in the Dobu Language of Papua**  
**New Guinea**  
**Nupela Testamen long tokples Dobu long Niugini**

copyright © 1985 Wycliffe Bible Translators, Inc.

Language: Dobu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 18 Apr 2025 from source files dated 9 Oct 2020

b7b1c532-e0bd-5fc1-87a9-1f5f70cc897d